



## الكتاب الأول

مجلس حيدية

المجلس الأعلى للثقافة



نتاج الخوف  
ناصر العزبي

DL

## لجنة الكتاب الأول

إدوار الخراط ( مقرراً )

حسين حمودة

حلمى سالم

خيرى شلبى

سمية رمضان

عبد العال الحمامصى

محمد كشيک

مجدى توفيق

يسرى حسان

مدير التحرير / منتصر القفاش

إخراج فنى / هشام نوار

التصميم الأساسى للغلاف محيى الدين اللباد + أحمد اللباد

لوحة الغلاف للفنان : عصمت داوستانى

- ٣٨ -

# نتاج الخوف

« حكاية من الصعيد الجواني »

مسرحية

ناصر العزبي



٢٠٠٠

- ٣ -



الى أهرتى التى ينزعنى المسرع منهم  
الى الزوجة عزه  
والى الأبناء سوزان ومحمد ونورهان

أقضى هذه السريعة  
ناصر العزبى





## شخصيات الحكاية

|               |                                                                                  |
|---------------|----------------------------------------------------------------------------------|
| فواز :        | شاب فى العشرينات من العمر . ملئ الجثة ، حاد الذكاء . أسمر . وسيم . قوى الشخصية . |
| حسان :        | الأخ الكبير لفواز . قصير القامة . ضعيف البنية .                                  |
| هند :         | زوجة حسان . جميلة ، فى أواخر الأربعينات من العمر .                               |
| محجوب :       | ابن حسان . فى الثامنة من العمر .                                                 |
| العم :        | عم فواز وحسان . رجل مستغل تزوج من أمهما واستولى على إرثهما .                     |
| على :         | أخوهند « ٣٥ سنة » وصاحب حسان .                                                   |
| مرسى :        | صديق فواز وذراعه اليمين ٣٠ سنة .                                                 |
| الخال :       | خال فواز « ٥٥ سنة » يبدو من تصرفاته أحيانا الحكمة والخبرة وأحيانا الحمية .       |
| هدايات :      | « ٢٠ سنة » ابنة خال فواز . والزوجة الثانية .                                     |
| كبير البرادة  |                                                                                  |
| كبير العوايدة |                                                                                  |
| كبير الدهاشنة |                                                                                  |
| ضابط          |                                                                                  |
| شاويش         |                                                                                  |



## شخصيات المسرحية

- الراوي : راوي ومنشد شعبي وعازف ربابة .
- الستيد : اثنان أو ثلاثة من الرجال . يشاركون بالعزف ويترديد بعض الكلمات أيضا نسمع منهم بين الحين والآخر كلمات الثناء والاستحسان لما ينشد به الراوي .
- المستمعون : هم المجموعة التي تستمع إلى الراوي وتشاركه أحيانا في الحديث وتتكون من :
- رجل ١ :
- رجل ٢ : « صاحب المكان أو كبير المجلس » .
- رجل ٣ :
- رجل ٤ :
- رجل ٥ :



يكون الديكور بسيطاً للغاية :

- مشاهد الدار تكون عبارة عن مجموعة من الدكك وطقطوقة بالإضافة إلى لوحة على الحائط الخلفى .
- وفى مشاهد الهيش تستخدم مساطب على أن تكون الخلفية مزارع .
- وفى مشهد العم يكون المكان فى مقدمة المسرح داخل بقعة ضوئية فى أقصى اليسار .
- من الممكن أن يكون الراوى والمستمعون له فى مستوى مرتفع وله سلم جانبي مكون من درجتين . ويكون هذا المكان بأكمله فى أقصى اليمين من مقدمة خشبة المسرح أمام الستارة الرئيسية .

### إشارة :

بداية من الفصل الثانى ، وفى الحوار الخاص بالحكاية يراعى نطق « القاف » « جيم » حيث وجدنا كتابتها تحدث لبساً فى الفهم ....

المؤلف



## الفصل الأول





( تضاء بقعة ضوئية على يمين المسرح قبل رفع الستار ) .  
مجموعة شخصيات ريفية منها من يجلس على المسطبة ومنها من  
يجلس على الأرض ومنها من يقف . والكل فى وضع انتشار .

رجل ١ : يعنى ده صحيح . الحاج راوى جاى ينشد هنا الليلة .  
رجل ٢ : أومال يعنى الناس دى كلها جاينين عشان يسمعوك  
أنت .

رجل ١ : بصراحة ياولاد أنا مش مصدق روحى .  
رجل ٣ : « وهو من الجلوس » لأ ، صدق . الحاج راوى بعت  
مرساله لنا وقال أنه جاى بالربابة بتاعته . وادى احنا  
جهزنا له القعدة . وربنا يجيبهولنا بالسلامة .

رجل ٢ : الحاج راوى . سيطه واسع قوى ، وجيته الليلادى هنا  
معناها أنه شاف فينا سميرة .

رجل ١ : وهو هيلاقى سميرة زينا فى الدنيا بحالها . طب دانا  
سميع ماليش زى . شوفوا الحتة دى « يتحرك مشخصا » .  
وركب عنتره عالحصان وسحب سيفه من الجراب وهات  
ياضرب شمال ويمين وقتل مالعدا ألفين .

رجل ٢ : لكن أنت يافالح متنفعش تكون عنتره لأنك أبيض  
وعنتره كان أسود هاها « يضحكون » .

- رجل ١ : إيهى . طب أبو زيد الهلالي « متحمسا » لما نازل  
الزناتى خليفة وطعنه فى عينه .
- رجل ٢ : شفتم بقى يارجاله أهو غلط . اللى ضرب الزناتى فى  
عينه مش أبو زيد ، اللى ضربه يافالح دياب .
- رجل ١ : ياسلام وهو دياب كان تبع مين ؟ مش كان واحد من  
جيش أبو زيد ، ثم إن أبو زيد هو اللى قتل الزناتى  
لما عمل حكيم وحطله له السم فى عينه .
- رجل ٣ : شوف بقى أنا متفق معاك فى كل حاجة . بس أنا  
مش مع أبو زيد لأن اللى عمله ده أسمه غدر وخيانة .
- رجل ١ : لأ مالکش حق ا هى دى مش حرب بينهم ، وفى الحرب  
كل شئ مشروع . المهم مين يهزم مين فى الآخر .
- رجل ٤ : ياجماعة مش وقته الكلام ده / أنتوا مش ملاحظين ان  
الراجل أتأخر ؟
- رجل ٢ : صحيح بأولاد دا الوقت سرقنا ، والكلام خدنا والليل  
كبس علينا .
- رجل ٣ : دا عمره ماعملها / لابد من أن فيه حاجة عطلته دا  
مياخروش غير الشديد القوى .
- رجل ١ : ليكون الرجل بعافية ولا ....
- رجل ٢ : قال الله ولا فالك يا أخى خليك محضر خير .
- « صوت ربابة »
- رجل ٤ : أهو الحاج راوى وصل بالسلامة أهه ومعاها الرباب .  
« يدخل الحاج راوى .. ممسكاً بربابة .. ويتبعه رجلين  
من السنيذة .

- الـراوى : السلام عليكم .
- الـجميع : سلام ورحمة الله وبركاته .
- رجـل ٣ : الحمد لله عاالسلامة يا حاج راوى . وغوشتنا عليك .
- الـراوى : ظروف السفر بقى يارجاله . القطر اتأخر شوية .
- رجـل ٥ : بركة أنك جيتنا بالسلامة . سلامات يا بركة .
- الـراوى : الله يسلمك .
- رجـل ١ : طب والله العظيم النهاردة عيد انك معانا . أه والله عيد .
- أنا جايلك من كفر الشيخ مخصوص عشان أسمعك .
- أصل أنا مالمطين بحكويك يا حاج .
- رجـل ٤ : وأنا جايلك من بلقاس . وجميع أهالى البلد هناك
- عاوزينك تبقى تشرفهم .
- الـراوى : عن قريب إنشاء الله .
- رجـل ٥ : وأنا جايلك من البحيرة . جاى اقلى بطلعتك . واسمع كلامك
- العسل . ياعسل أنت ياعسل .
- الـراوى : الله يخليك .
- رجـل ١ : والنبي يا حاج كل حكاياتك حلوة . سَمعنا يا ابو الطرب .
- داحنا والله العظيم متشوقين .
- رجـل ٢ : دهده . أنت متسريع كده ليه ياراجل .
- رجـل ١ : إيهى ! إلا متسريع دانا متسريع . ومتسريع ومتسريع ...
- رجـل ٣ : ماتفضوها بقى سيرة أنت وهو . خلونا نسمع اللى
- أحسن منكم ... النبي سمعنا صوتك ياريس .
- الـراوى : أنا معاكم للصبح يارجاله . متقلقوش . أنا مش ماشى
- إلا لما أراضيكوا كلكم . مش هاسبكوا إلا لما تزهبوا منى .

- رجل ١ : وهو معقول ! فيه حد فى الدنيا يزعل منك . ربنا  
يباركلنا فيك ياراجل يا ذوق .
- رجل ٣ : الشرابات يا ولاد - أقعد ياد أنت وهو - ولا أجيبلك  
حلبة ياريس ؟ ينسون يا واد للريس عشان يسلك صوته .
- الراوي : « يجرب ربابته » . « الجميع يهللون فرحا » .
- رجل ٥ : ياسلام ياسلام ، والنبي حكاية من حكاياتك العجب .  
يا عجب أنت يا عجب .
- رجل ١ : حكاية عنتره . أو حكاية أبو زيد والزناتى .
- رجل ٢ : وليه متكونش حكاية أيوب وناعسة .
- رجل ٣ : كل شئ بالصبر يارجاله . إلا صحيح ياريس . هتسمعنا إيه الليلة ... ؟
- الراوي : أنا الليلا دى هسمعكم حكاية جديدة خالص . طازه
- رجل ٤ : كل اللى يجى منك يا حاج كويس .
- رجل ٥ : الحلو ميقولش إلا الحلو . يا حلو أنت يا حلو .
- الراوي : الله يجبر بخاطرك .
- « يجرب ربابته . الجميع يهللون »
- حكاية طازه . لسه جاى بها مالصعيد الجوانى دلوقت ، من قنا .
- رجل ٤ : أجدع ناس . ياراجل يا صالح .
- رجل ١ : يعنى أيه طازه يا حاج ؟! وهى الحكاوى زى الخضار والفاكهة .
- رجل ٣ : أومال أيه . الحكاوى زى الخضار والفاكهة . فيه  
الطازة وفيه البابت « الجميع يضحكون » .
- الراوي : كل شئ بالهدوء يارجاله . اقعدوا بس انتو ونظموا  
نفسكم « يقف . فيهللون » كل شئ بالهداوه .  
أنا معاكم لغاية لما تقولوا بس . « يجرب ربابته »

سواح أنا ياعرب .  
وكلنا ولاد عرب .  
اسمع حكايات عجب .  
اللى هجم وضرب .  
واللى أنهزم وانضرب .  
آوح وعريد . نهب .  
ولا يعجبوش العجب .  
« الجميع يهللون استحسانا »

الـراوى :

لا دانا باسلك الحنجرة لسه .  
وأنت يا قاعد وسامع .  
خليك كريم المسامع .  
وأرمى مشاكلك لضهرك .  
واصفى بجوز المسامع .  
« يهللون »  
صفيلى بالك ياسامع .  
وبلاش تضايق فى سامع .  
والله بكره هتفرج .  
وتعودلى بعد سنين سامع  
« يهللون »

الـراوى :

أنا كنت باسبخن . بس يابنى أنت وهو . أقعد ياريس .  
هنبداً إن شاء الله وبسم الله . وهنحكى الليلة دى حكاية  
جديدة وزى ماقلتكم حكاية من الصعيد الجوانى .  
« ينشد على ربابته »

بسم الله الرحمن الرحيم هنبدى الليلة

نبينا الزين كحيل العين بذكره الكون سهرة جميلة  
يامستمعينا / صلوا عليه صلوا عليه  
يامأنسينا / صلوا عليه صلوا عليه  
وملحة فى عينك ياللى . ياللى ماتصلى . ماتصلى  
على النبى .

الجميع : عليه الصلاة والسلام . ألف صلى عليك يابى .  
الراوي : حكاية الليلة هنسميها . حكاية الفتى فواز . وفى  
الحكاية النهاردة ياسادة ياكرام ولايحلى الكلام  
إلا بذكر النبى .

الجميع : عليه الصلاة والسلام .  
( تضاء بقعة ضوئية فى مقدمة منتصف المسرح يظهر  
فيها فواز ) .

الراوي : « منشدا »

لكل قصة وحكاية بطل  
وقصتنا كان بطلها خطر  
ومين شاف بدايته لزماً يقول  
ومين شاف طفولته لزماً يقول  
- كل من شافه فى داره راح يقول -  
بأن بطلنا لزماً يكون

يكون فى النهاية فخر الوطن  
ولكن ظروفنا وبعض العادات  
يتحكم مصيرنا وتعند ساعات  
تحول مسار الطريق الصحيح

ويبقى الشريف فى النهاية خطر

« أثناء الإنشاد يتحرك الراوى ليقف خلف فواز .  
يقوم فواز بمشهد تعبيرى بسيط يؤكد ماينشده  
الراوى »

**الـراوى :**

« يحكى » وفواز ياسادة ياكرام . كان الأخ الصغير .  
وكان أخوه الكبير حسان . « يخرج فواز من البقعة  
الضوئية حيث يظهر حسان الذى يؤدى مشهد تعبيرى .  
يبدأه واضعا وجهه بين كفيه فى الوضع جالسا ثم  
يعتدل ويقف ثم يتحرك ببطء فى مكانه . ثم يبدأ فى  
الجرى تدريجيا - وهو فى مكانه - ويستمر فى الجرى  
حتى رفع الستار » .

**الـراوى :**

وحسان ياسادة يتيم الأب هو وأخوه فواز  
وأمرهم من بعد الأربعين قالت ياجواز  
والعم كان العريس والوصى عـالولاد  
والأرض باعها واشتراها  
والأم حالها كان هواها  
وضاع ماينهم حق الولاد  
« يحكى » حسان وفواز ياسادة مارتضوا دا الحال .  
حزموا خلجتهم وابتدوا الترحال . عاشوا فى مكان  
لواحدهم وحسان الكبير بدأ يدور على عمل .  
وبالفعل اشتغل مزارع عند واحد من أصحاب الأطيان .  
وفواز كان بيذاكر ويتعلم . وكان الكبير حسان هو  
الأب والأم لفواز . « منشدا »

حسان وجه طفولى لكنه كان راجل .  
وقف مع فواز ، والواقفة واقفة راجل .  
كان وقتها له طموح ، وكان وكان .. لكن الظروف  
والزمان يهدوا ميت راجل .

### « ترفع الستار »

« حجرة المسافرين فى بيت ريفى »

حسان لا يزال يجرى . يلاحظ عليه الإرهاق .  
تدخل هند . يعود الراوى إلى مكانه .

هند : « مفزوعة » حسان ؟! . خبر إيه . ليش بتجرى إكده  
حسان : هو اللى جعلنى أثور عليه . هو اللى ورطنى ونرفزنى  
هند : هدى نفسك أمال . هدى نفسك عشان تعرف تتكلم  
حسان : كان عاوز يساومنى . عاوز يستغل الظروف . كان  
فاكرنى لجمة طرية .

هند : مش فاهمة شئ واصل يا حسان . اهدى أومال وفهمنى .  
حسان : كان قصدى اضربه . اضربه عشان اخذ حقى .  
هند : بتكلم عن مين . أنا مش فاهماك .  
حسان : عويس . صاحب الأرض اللى باشتغل عنده .  
هند : وأنت رحت له واحدك ليه ؟ . ماجولتلك خد خوى على معاك .  
حسان : « منفعلا وكأنها سبته » وأنا مابعرف آخذ حقى بيدى ياهند ؟!  
هند : جطع لسان اللى يجول عليك اكده . أنا جاصدى ان  
الراجل ده كان لازم ياخذ لنفسه خط رجعة جدام الرجالة .  
حسان : رفض يعطينى أجرتى . كان عاوز ياكل على عرقى .  
وفهمنى أنى لو طالبتة تانى هيببلغ عنى .



- هــنـد :** الجبان ده هيفضل ماسك عليك موضوع التجنيد ده ذله ،  
كلتها سنتين وتعدى السن المطلوبة .
- حـسـان :** وأنا هاستنى سنتين فى الذل ده .
- هـنـد :** عشان أكده كنت عاوزاك تاخد على خوى معاك  
وتتفاهموا معاه .
- حـسـان :** خلاص ياهند . أنا اتفاهمت معه . معدش هيساومنى .  
« يتذكر » الفلوس كانت معاه فى يده . وكان  
بيهددنى . طلبت أجرى ، رفض . ضربته عشان اخذ  
فلوسى . هلل وكان هيجمع العمال اللى عنده . رفعت  
الفساس اللى فى يدى وضربته على دماغه . وجع .  
مات . أنا خايف . خايف .
- هـنـد :** إهى ، ماتخاف يا حسان . ماتخاف يا حبيبى .
- حـسـان :** لع . أنا مش هاقدر على اكده . أنا هاسلم نفسى للشرطة .
- هـنـد :** خبر أیه عاد . ماجولتلك ماتخافش .
- حـسـان :** بس أنا .. أنا ..
- هـنـد :** أنت أیه يا حسان . أنت راجل وعملت اللى كان لازم  
تعمله . أوعاك تجول خايف . الحرمة بس هى اللى تخاف .
- حـسـان :** والشرطة ؟
- هـنـد :** مالها ومالنا . ما تجمد جلبك أمال . هو فيه حد شافك  
وأنت بتضربه ؟!
- حـسـان :** لع . مافى حدا شافنى . بس أنا .. أنا .
- هـنـد :** وبعد هالك يا حسان . خلاص يا حبيبى / جولتلك  
أطمئن يا حبيبى / طالما ما فى حدا شافك يبجى ليه

تخاف ! إحننا محتاجينك معانا يا حبيبى . أنا واللى  
فى بطنى .

حسان :

بتجولى إيه ياهند ؟!

هتند :

اللى سمعته . هتبقى أبو محجوب .

الـسـراوى :

« يتحرك ليقف أمامهما منشدا »

ولكن ظروفنا وبعض العادات

بتحكم مصيرنا وتعند ساعات

تحول مسار الطريق الصحيح

ويبقى الشريف فى النهاية خطر

« يحكى »

حسان ياسادة الأخ الكبير لفواز

وهند دى كانت زوجة لحسان

تشوفها صبية - لكن الحقيقة فى السن فوق الأربعين -

وكانت عزيزة فى البلد ، والنسوة لها سامعين

وكم ان ياسادة

الست هند كانت ست مزوجة

رجل ٣ :

يعنى إيه ست مزوجة ياريس ؟

الـسـراوى :

سألتنى وهاجوبك . يعنى اتجوزت كتير . اتجوزت

اتنين قبل حسان . والاتنين كانوا شداد بخلاف حسان .

كانوا شداد الطبع والمخلقة .

كانوا شداد فى اللفظ والهيئة .

الصوت أجش واليد ملزابه .

واحد منهم كان مسجل خطر فى أقسام الشرطة وهارب

من أحكام سجن والبلد كلها تهابه ، عاشت معاه  
سنتين لغاية لما مات على أيد واحد من خصومه ،  
وجوزها التانى كان من المطاريد .

رجل ٣ : يعنى إيه ؟

الراوى : « مقاطعا » عارف سؤالك . ولو استنيت على كنت  
جاوبتك . يعنى ياسيدى مالى الشرطة كانت  
بتطاردهم دايماً / وكانت هند عايشه وياه فى بطن  
الجبل . وواحد من رجالته غدر به ، وزَّ عليه الشرطة  
اللى قامت بمهجامته وقبضت عليه واتحاكم ومات  
وهو بينفذ الحكم . يعنى كانت أرملة لرجلين من  
الخطرين

شريت منهم ولا شربوا منها  
عاشت حياتهم ما عاشت حياتها  
كانت شديدة  
ولا كان فى قلبها خوف  
سمع عنها حسان من قبل ما يراها  
وحسان كان صاحب أخوها على  
وفى مرة زاره فى بيته ورأها  
حس أن قلبه اتنفض وبأنه جه وراها  
بص لها .. وعن أخوها البصه وراها  
« منشدا » لما راها عرف بأن دى نصيبه  
عزم عليها وهى برضه بتريده  
عارض أخوها فى جوازها

- وخالها برضه واعمامها لكنها تريده  
ما كان جوارها حدا مادد لها أيده .  
ولا كان جواره حدا إلا أخوه وحيدة .
- رجل ٥ :** ياسلام يا حاج ياسلام . كل اللي بتقوله تمام التمام التمام .
- رجل ١ :** لا يا حاج إحنا عاوزين نسمع حكاية أبو زيد الهلالي سلامة والزناى خليفة .
- رجل ٤ :** أيوه ياريس / خرينا فى اللى نعرفه أحسن مالى مانعرفوش .
- رجل ١ :** أو حكاية أيوب وناعسة .
- رجل ٢ :** يا جماعة بس اسمعوا الحكاية كلها ، إحنا لسه فى أولها .
- رجل ٣ :** والله ياريس كل اللى يطلع منك بركة .
- رجل ٥ :** آه والله ، دانا جايلك مالبحيرة مخصوص ، أى كلام منك بركة . يابركة أنت يابركة .
- الراوى :** وأنا جايب لكم الحكاية دى مخصوص ، بس أسمعوها للآخر إحنا لسة فى الأول / أنا لسة بأعرفكم على شخصها .
- رجل ٣ :** وبعدها لكم يا جماعة ، أقعد ياواد أنت وهو ، انتوا عاوزين الرئيس يزعل منا ولا أيه ؟!
- رجل ١ :** أحنا بنتكلم معاه بعشمننا يا حاج . أوعى تكون زعلان منا ولا تكون زعلان منا ولا تكون زعلان .

- الراوي: « منشدا » أنت يا قاعد وسامع .  
 خليك كريم المسامع  
 وأياك تضايق في سامع  
 وأصغيلي بـ الجوز مسامع .
- الجميع: « يهللون » أحكى يا حاج اللي أنت عاوزه . اتفضل .  
 ويعدين كمل ياريس .
- الراوي: « منشدا » حسان ده كان أخو فواز  
 وهند دي كانت زوجة حسان  
 كانت الحبيبة والدفء هي  
 من غير كلام كانت هي  
 نصح ورضا وإحكام هي  
 وفي الأنوثة كمان هي  
 كانت الصعاب والمدد هي  
 من غير كلام كانت هي  
 حب وعزم وونس وتمنحه القوة  
 « مشهد الخال مع حسان »
- حسان: خير يا خال مش عوايدك تشقر علينا .  
 الخال: جاي أطل على اخوك فواز ..  
 حسان: فواز ! ماله فواز ؟  
 الخال: ماجه حذاك ....؟!  
 حسان: وين فواز يا خال ؟  
 الخال: ده ده وبعد هالك يا حسان . يعنى هايروح وين ؟  
 حسان: حاسس بأن فيه شئ بتريد تداريه .

الخـال : أنا غلطان أنى جيت . كان مفروض أفهم أنك هتقلق .

حسان : وين فواز يا خال لا داعى أنك تقلقنى أكثر من اكده .

الخـال : ما فى شئ . فاته جاي على إهنة ، ما أنت عارف خوك واللى دايماً يعمله مع أمك وجوزها .

حسان : ما أنت السبب ياخال ، جوزتها بعد بوى ما مات .

الخـال : كت ترید أفوتها من غير جواز يافواز ؟ دى برضه حرمه وکان لابد استرها . وبعدين أنا ماجوزتها للغريب . أنا جوزتها لعمك .

حسان : عمى ؟ اللى كل مالنا واطياننا .

الخـال : وعشان اكده خوك فواز عمل معاه اليوم عاركة .

« خبط على الباب »

فـواز : « من الخارج » افتح ياخوى أنا فواز .

حسان : أدخل يافواز . افتحى له ياهند « يدخل فواز »

الـراوى : « متحرکا تجاه فواز »

فواز ده شهم وجدع لكن الظروف أقوى .

واد فى الحقيقة نطل . لكن الظروف أقوى .

واد كان فتوه قوى . لكن الظروف أقوى .

فهم ونجاية وذكاة . لكن الظروف أقوى .

حكمت عليه وابتدى ينفذ الأحكام .

فـواز : أیه جابك هنا يا خال ؟

الخـال : جاي أطمئن عليك .

فـواز : ماتخافش على ياخال / أنا زين .

- الخـيال :** عارف ومتأكد من اكده يحميك ربنا ويكملك بعجلك .
- حـسان :** ليش طالبت عمك بالأرض يافواز ؟ أنا سبق وجولتلك خليك فى علامك وأنا اللي هاتفاهم أمعاه لما يجون الأوان .
- فـواز :** أمك مش رايدانى معاها فى البيت . هى اللي اضطرتنى لكده / وكمان أنا مش جادر أصبر أكثر من اكده .
- حـسان :** وبعد هالك يافواز . أنا عاوزك تنتبه لعلامك ويس .
- فـواز :** لزماً تكون الأول على زملاتك زى كل سنة .
- فـواز :** لا ياخوى أنا مش عاوز العلام ، أنا عايز اشتغل امعاك ، أنا كبرت ومش معجول أسيبك تشيل الحمل وحدك . مش معجول أستنى زى الصغار .
- حـسان :** ماهو العلام فى المدرسة شغل يافواز ، أنت لازم تكمل علامك لاجلن تكون حاجة كبيرة . عاوزك تكون ضابط شرطة ، عاوز تكون لك هيبة .
- « تدخل هند تحمل الشاى » .
- هـند :** الشاى ياخال . اتفضل الشاى يافواز .
- الخـيال :** اتجعمصى ياهند .
- هـند :** أنا بدى أتكلم معاكم يا رجاله .
- حـسان :** ماتتكلمى ، ولا لسانك يزلف بكلمة ياهند .
- هـند :** لزماً اتكلم ، لزماً يعرفوا ، دوول عزوتك يا حسان .
- الخـيال :** خبر أيه يا حسان ؟ أيه الحكاية ياهند ؟!

**فـوـاز:** اتكلم ياخوى .  
**هـنـد:** حسان اتعارك مع صاحب العمل وجتله .  
**فـوـاز:** بتقولى جتله ؟!  
**الـخـيال:** زين مافعلت يا حسان / كان لازم تجتله /  
 كان دايما بهدك / ودى هى الطريقة اللى تضمن  
 سكاته بها .  
**حـسـان:** كان جاصدى اخد حجبى . لكن هو اللى ...  
**هـنـد:** حسان عايز يسلم نفسه للشرطة ياخال . يرضيك ؟!  
**الـخـيال:** أنتى بتجولى أيه ! الكلام ده صُح يا حسان .  
**حـسـان:** أنا . ياخال ...  
**الـخـيال:** أنت عملت اللى كان لازم تعمله / لوما كنت جتله  
 كنت أنا اللى جتله .  
**هـنـد:** حسان راجل ياخال مش حُرْمه . خد حجه بيده .  
**فـوـاز:** ماتخاف من شئ يا حسان احنا ضهرك وهنحميك /  
 الشرطة ما ممكن توصلك .  
**هـنـد:** ما حدا شافه وهو بيضرب صاحب العمل .  
**الـخـيال:** أُمال أيه بس اللى مخوفك ، أسمع . أنت مالىوم  
 مالك صالح بشئ . ولا تشغل دماغك / أنا هاحضر لك  
 بُندجه وحتة طبنجة .  
**حـسـان:** وده ليه ! أنا مش ممكن أشيل سلاح / أنا ماحبش الجتل .  
**الـخـيال:** لكن أنت ماعاد لك تمشى بدون سلاح / لازم الناس  
 تعرف أنك تجدر تحمى نفسك .  
**حـسـان:** ياخال سلاح لع ، سلاح لع يافواز . أنا أجدر . لكن ..



الخـال : خبر أیه یا حسان أنت هتشیل سلاح وهاتمشی به جدام  
الناس .

حسان : أنا أجدر أحمی نفسی من غیر سلاح .

هند : السلاح هو اللى هیحمیک . هو اللى هیجیبلك حجوجك .

الخـال : الغدر لزماً تَعْمَلْهُ حساب / ولأزم الناس تعملك ألف  
حساب / جوم .. جوم معایا یافواز .

فـواز : لا یا خال أنا هاجعد مع خوی .

حسان : البيت بیتك یافواز .

الخـال : قوم معایا یافـواز خوك لسه عریس ، اجعد عندی  
یومین ویعدین ابقى اجعد مع خوك کیف ماترید .

حسان : أنا جای أوصلكم .

فـواز : خلیك جاعد . احنا عارفین طریقنا یا حسان . استریح أنت

حسان : هوصلكم لأول الطريق .

« یخرجوا . لحظات ونسمع طلق نارى » .

هند « صارخه » : حسان . عملوها وجتلوك .

الـراوى : حسان مصیره احتدم ویطلقة راح حاله

وفواز طریقہ ابتدی والتار ده راس ماله

حسان ماراح هدر فواز اخذ تاره وَّجْدُ

فواز أخو حسان البال ما هناله

ولا كان بیجیلہ النوم

ولا لحظة غفل .. نام ..

مکتوب وبقى محتوم

غیر لما خد بالتار

فواز ياناس ابتدى صار الحليم جبار  
 حط اللثام وابتدى والعقل منه طار  
 فواز ترك الدار صار يهوى ضرب النار  
 صاده المصير وابتدى يفند الأحكام ... وَحْدُ  
 لا إله إلا الله .

الجميع :

الراوى : انتوا نمتوا منى ولا ايه .. أصحى يا بنى أنت وهو « ينهر

من بجواره » اللى جنبه واحد نايم يصحيه يا جماعة ...

رجل ١ « أصوات متدالة » : احنا صحينك ياريس .. كما ..

رجل ٢ : وبعدين .. عمل ايه فواز .

الراوى : « منشدا » : حليم وصار جبار

والعقل سابه وطار

فواز ماعدلوش دار فواز صبح رحال

عصفور صغير واندبح

لعب الهوى بريشه

غلب الرياح وانطلق زى الرصاص ريشه

ماعاد ياناس ينقلب

ريحة البارود عششت جوه نخاشيشه

عشق المصير والدم

صار يهوى ضرب النار

صاده المصير وابتدى .. ينفذ الأحكام .. وَحْدُ

« مشهد العم مع فواز »

« فى مكان ما .. ممكن وأن يكون فى مقدمة المسرح »

فواز : الحق مافيه خشا

- العم : أیه اللى بتریده یاولد ؟
- فواز : حَجى وَحَج خوى یاعمى .
- العم : دكسر حُجك . أنت یاولد مالك حَج عندى .
- فواز : عهد وخذته على یاعمى ما ارجع بدون حَجى وَحَج خوى ، میراثى اللى تركهولى بوى .
- العم : یاولد بجولك ارجع لوین ماجیت .
- فواز : اسمع یاعمى . أنت خدت منا كتیر / خدت فلوسنا وخذت طیننا وخذت أُمای / بعد موت بوى فرجتنا وحرمتنا من لمتنا . سيبنا لك البيت ومشینا / لكن دلوجت قسماً بالله ماماشى من غیر ماخذ حَجى ..
- العم : أُمك اللى بتتكلم عنها دى مرتى .
- فواز : والأرض .. الطین ؟!
- العم : أرض أُمك وأنا برعاها .
- فواز : وأرضى أنا وخوى .
- العم : أسمع یاولد / ماتكتر امعاى فى كلام .. وأعرف أنى مابتهدد . وأعلى مافى خيلك أركبه .
- فواز : كنت أجدر أخذ حَجى بس أنا جولت أجى أعرف ردك .
- العم : « بسخرية » : یعنى هتعمل أیه . « یرفع فى وجهه السلاح » مَشى یاولد من إهنه . لأطْحَك .
- فواز : أنا ماشى یاعمى . أنا غلطان . أنا « یفاجئ عمه ويسقط السلاح من يده . ويمسك السلاح فى يده .. »
- فواز : حَجى یاعمى / یاجوز أُمای / الأرض اللى أنت بعتها . الفلوس اللى أنت ضيعتها . ورثى وورث اخوى .

**العم :** ف .. فو .. فواز عيب يا ولدى دانا فى مقام والدك .  
**فواز :** أخرس . أخرس يا كلب . أنا دلوجيت أقدر حجبى .  
بس عشان أخذ حقى كامل . فيه حاجة صغيرة  
لازمًا تحصل . الحاجه دى أنك تموت وبعد إكده أورثك  
« يطلق عليه النار »

**الراوى :** والحق حق ولو كان الزمان غدار .  
والأرض عرض لزماً يحفظه .  
فواز ماعاد خيار .  
ليله مالوش نهار .

« يحكى » مسا الفل عالرجالة اللى زى الفل . وحِدُووه .  
**الجميع :** لا إله إلا الله .

**الراوى :** وزى ماعرفتوا وقلتلكم . حسان اتقتل وفواز خدله  
بتاره . وعرف فواز طريق الانتقام وراح لعمه وطلب  
ورثه ولما رفض قتل عمه . فواز ماعاد حلیم طيب ،  
انقلب من أليف لوحش . شال السلاح اللى مارضى  
حسان يشيله وعمل لنفسه فى النجوع والكفور هيبه .  
« للجالسين » صاحين معايا ؟ . طب سمعونى الصلاة  
على النبى .

**الجميع :** الله م صلى عليه . ألف صلى عليك يابى ..  
**الراوى :** « موضحا » : فواز ده جانب من الحكاية . الناحية  
التانية للحدوتة أو الطرف التانى بتاعنا : هند .  
الحكاية حكاية فواز وهند . وهند كانت حامل من  
حسان ولما مات حسان فواز انقطع عن زيارتها . وهند

كانت بتجيلها أخبار فواز كلها عن طريق أخوها علي.  
وبعد فترة بَعَثَتْ هند لفواز مرسال / طلبت تقابله  
عندها في البيت .

### « مشهد هند في البيت مع فواز »

|            |                                                                                                                                                           |
|------------|-----------------------------------------------------------------------------------------------------------------------------------------------------------|
| فـواـز:    | خبر أیه یامراة خوی ؟                                                                                                                                      |
| هـنـد :    | کت باریدک فی کلمة یافواز .                                                                                                                                |
| فـواـز:    | وَأنا سداد . اتکلمی یاهند .                                                                                                                               |
| هـنـد :    | الدار دی دار خوک حسان الله یرحمه . وهیفضل دار<br>خوک .                                                                                                    |
| فـواـز:    | وَضَحی یاهند عاوزة تجولی إیه ؟                                                                                                                            |
| هـنـد :    | عاوزک تعیش معانا أهنة فی الدار یافواز / أنت<br>دلوجیت مالک دار تتاویک . واحنا . أنا وولد اخوک<br>محتاجین راجل یعیش معانا . یرعانی ویرعی<br>محبوب الصغیر . |
| فـواـز:    | تجصدی .. ؟؟                                                                                                                                               |
| هـنـد :    | تعیش معانا یافواز / فی الحلال / نتجوز .                                                                                                                   |
| السرّاوی : | فواز صحیح کان صبی<br>ولکنه کالشجعان<br>راجل وسابق سنه<br>وفی الکلام قوال<br>وفی المعركة کان عفیّ<br>راجل بست رجال<br>والست هند اهتدت                      |

قالت مليش خيال

بعثت نادت له وراح لها فى الحال .

عرضت عليه الجواز . وايه ياترى اللى كان ؟

« مشهد هند فى البيت مع أخوها على »

على : لكن ده مش ممكن / إنت ناسية فارج السن اللى بينكم .

هند : اسمع يا على أنت فى المرة اللى فاتت عارضتني فى جواز حسان / جولت أنه أصغر منى لكن اتجوزته / ودلوجت ...

على «مقاطعا» : حسان كان أصغر منك لكن فواز قد ولد من ولادك / أنت عديتى . الخامسین ياهند / فوقى لنفسك / فواز يادوب عشرين .

هند : هاتجوزه يا على .

على : إكده . ماعاد خشا ولا حيا !

هند : وليش الخشا ؟ أنا ما جولت عيبه .

على : إتروى ولا تتعجلى ياهند / فكرى ، لوما كان عشان السن يبجى عشان خاطر كلام الناس ، يجولوا أیه ؟ يجولوا اتجوزت أخو جوزها .

هند : هند ما بيهمها كلام الناس . ولا حداً يجرؤ يفتح خاشمه . هتجوزه يا على وأنا عارفه بجول أیه .

على : وأنا مش موافج ياهند / لو اتجوزتيه جدمى ما هتعتب دارك واصل .

هند : الباب مفتوح لك فى أى وجت يا على .

عليه : إكده ياهند !؟. أنا خارج . لكن اعرفني بأني مش  
وحدى اللي ما موافج على فعلك هذا / أعمامك كمان  
ماهم موافجين ولا هيوافجوا على الجوازة دي واصل .  
« يخرج عليّ ، وتظل هند واقفه ، ويتحرك الراوى  
ليقف بجوارها »

الراوى : « منشدا » : والسـت هند قالت والكلام كان سيف .

لافت على فواز وكان لها وكانت .

كانت له ستر وغطا

كانت له أم حنون

وكانت له زوجة وحبيبة متولفه بوليف

وهو .. من كلام الناس ماتهزش

وكان لها زوج .. وفى الأخلص كان مخلص

وكان الأب لابنها وفى الأبوة كان مخلص

وقا بالدين لحوه وكان مخلص

« مشهد هند فى الدار مع فواز »

هـنـد : الأكل ياسيد الناس ...

فـواز : تعبـتك معايا ياهند .

هـنـد : ماتجول كده أنت جوزى . سيدى وتاج راسى . ليه  
تجولى اكده ؟

فـواز : أنا محتاجك ياهند . خليكى دىما امعاى . ماتبعدى

عن عينى . البلد كلتها وحوش وديابة . وأنا مش جدهم .

هـنـد : أنت جدهم وجدود ياسيد الرجالة .

فـواز : بس أنا لوحدى !

هـنـد : ماتجول اكده . إحنا عزوتك ماتخاف ابداً يافواز .  
أنت راجل والكل بيهابك ويعملك بدل الحساب ألف  
حساب .

فـواز : « بعد لحظة صمت » أمال وين محجوب ؟ . أنا  
ماشاهدته اليوم .

هـنـد : نام . ظل ينتظرك / ولما تعب البكا نام . الولد  
متعلق بك قوى يافواز .

فـواز : أجوم اطل عليه .

هـنـد : طب كل لجمة .. دانت جاي شجيان ولسه ماريحت .

فـواز : أطمئن عليه جبل ما اكل .. ده أمانه في رجبتى ياهند .  
ابنك وابن الغالى .

هـنـد : جد اكده بتعزه ؟

فـواز : أنتوا الاتنين كل حياتى

هـنـد : وأنت كمان يافواز كل حاجة لنا فى الدنيا .

فـواز : أنا مابعرف بدونك كت كيف أتصرف . أنتى وجفتى  
جنبى وشلتى الخوف من جوايا / أدتينى الشجة  
وجوتينى ضد العدا .

هـنـد : أنت راجل من يومك يافواز . أنت سيد الناس ولزماً  
الناس دى كلتها تعرف أنك سيدهم . وماتتعجل .  
أزرع الخوف جواهم وهددهم وهتشوف جد أیه صحة  
كلامى . الكبير جبّل الصغير هيجمى ويسلم .

**\*\* ستار \*\***



## الفصل الثانى



- السنيدة :** اللهم صلى على النبي .
- رجل ١ :** وبعدين يا حاج راوى .
- رجل ٥ :** كمل والنبي يارس داحنا متشوقين لباقي الحكاية .
- رجل ١ :** سيبوه بس يتكلم يارجاله . اتفضل يا حاج .
- الراوى :** الله يزيد مقدارك . صلاة النبي أحسن .
- الجميع :** ألف صلى عليه .
- الراوى :** المهم يارجاله . زى ما إحنا عارفين السنين بتمر / ومر على جواز هند وفواز . ثمانية . ثمن سنين وفيهم الولد محجوب ( ابن أخوه حسان ) كبر . وسنه بقي ثمانية .
- رجل ٣ :** يامعجل الأيام لما تمر .
- الراوى :** وياسادة ياكرام . ياسعد يا إكرام . قصتنا / قصة الليلة دي . قصة فواز وهند . القصة لسة طويلة .
- رجل ١ :** واحنا معاك للصبح .
- رجل ٢ :** أحكى ياراجل ياسكر .
- الراوى :** والحكاية كلها فى البداية اللي حكمها الظروف . وزى مالسنين بتمر / فيه حاجات كتير بتتغير . وزى ماكانت عادات الناس بتتورث / كانت حاجات تانية بتتوارى . ونفتكر مع بعض ياجماعة . هه . أماختبركم / اشوفكوا معايا ولا لاء ؟! « يُذكرهم »

هند لما كانت مع حسان . جوزها الأولانى .  
 قالت له كلمة . قالت له ماتخافش . الراجل  
 مايخاف . ولما اتجوزت فواز قالت له نفس الكلمة  
 قالت له ماتخافش . ولزماً ولا بد بأن الناس دى كلتها  
 تخافك . خليكوا معايا يامحترمين / فيه فى  
 الحكايتين حاجة مشتركة . ياترى أيه هى ؟ قولوا  
 يارجاله .

**رجل ١ :**  
**الراوي :**

إيه ياريس ؟

لأ . صحصحوا احنا لسة فى أول السهرة . الحاجة  
 المشتركة فى الحكايتين ياسادة كلمة الخوف . هند  
 بدأت تشيل الخوف من جواه . وتقويه . وفواز بدأ فى  
 قلوب الناس يزرع الخوف . وهند تقويه / والناس كلها  
 بقت بتجننى من وراه الخوف وخوفها يدويه والكرباج /  
 حتى ولو كان مالوش صوت / لكن له صدى جوه  
 النفوس خوف / هو اللى بصنع ناس ويهدم ناس /  
 إحنا الطعم بتاع الخوف / واحنا ياسادة اللى بنوجد  
 الخوف جوانا مهوش غيرنا .

**رجل ٢ :**  
**الراوي :**  
**الستيدة :**  
**الراوي :**

الله أكبر ياريس / والنبي تانى / تانى ياريس .  
 الله يخليكوا . الله يخليكوا . حاضر . حاضر معاكوا  
 من تانى .

قول ياأبو القواله . قول .

«منشدا» : والست هند ياناس كانت هى .  
 وقفت معاه الواقفة اللى هى .

حبته أكثر من اجوازاها اللى قبله / ياناس هى .

حنت عليه .. حبه .

حنت إليه .. عشقته .

أديته أكثر .

وقفت معاه . ومنها أخذ فواز قوته / هى .

شالت الخوف من جوفه .

زرعت مكانه .. العزم والقوة / هى .

### « مشهد هند وفواز »

( فواز رغم قوته يبدو وكأنه قزم أمام هند التى

تحدث إليه وتنصحه . وهو يقف أمامها يسمع

ولا يتحرك . وهى تدور حوله ) .

## هند :

اسمع يافواز / عشان تكون قوى . مش لازم تخاف

واصل . خَوْف ولا تخافشى أبدا / دىما تكون أنت

البادىء بالهجوم . أياك تسلم لخصمك . أو تسالمه /

حدد مكانك ومن وين ماكنت / أعمل مابدا لك . بس

تكون عارف أنت أيه وأنت فين . وتكون عارف

بالضبط أيه هو حجمك اللى أنت بتريده . مش اللى

الناس عاوزه . حَرَصْ ولا تخونش . خَوْف لكن

ما تخافش .

وإياك تقف وتتردد . أياك لسانك يلجم

ولا يتلجلج .

إياك تقول لكن . أو تقول مالكنش .

ديما تكون عازم ماتترددش .

واسمع كثير للكلام . اسمع ماتتكلمش .

وأوعاك تكثر مالوعود . عشم ولا توعِدش .

وتانى ندخل فى الحكاية .

بس أنتوا كونوا معايا .

معاك ياريس .

معاك يا أبو القوالة . معاك للمصبح .

نرجع لمرجعونا . ونأكد تانى كلامنا نقول

« منشدا » .

فواز بهند لقى ساعده .

وخاله جانبه كان ساعده .

وضموا ليهم على واتواعدوا .

وصاحبه مرسى وقف ساعده .

والكل وقفوا مع فواز واتعاهدوا .

« موضحا » :

يعنى بقوا عزوه . فواز وهند مراته وخاله . « سائلا »

ومين كمان يارجالة ؟

أخو مراته . على .

تمام . الله يفتح عليك . كمان معاهم صاحبه مرسى .

« مشهد فواز ومرسى والمحجوب »

أنا مديونلك بعمرى ياريس فواز .

أنت صاحبى يامرسى . وكان لازم أعمل اكده .

**الـراوى :**

**الـجميع :**

**السنيـدة :**

**الـراوى :**

**رجـل ١ :**

**الـراوى :**

**مـرسى :**

**فـواز :**

- مرسى:** كنت واقف قبل ما يقتلنى .
- فواز:** كان جايلك من ورى ضهرک . يعنى مش راجل !
- مرسى:** جاى ياخذ تاره منى . لحفته على آخر لحظة ونبهتنى .
- خدت باللى . ضربته . وساعدتنى فى دفنه .
- فواز:** ولغاية دلوقت ما يعرفوش حاجة عن موته . ولاحد هيعرف لأن سرک فى بير .
- مرسى:** أنا مديونك بحياتى / أطلب منى أى شئ ياريس فواز .
- فواز:** عيب يا صاحبى . الصداقة ملهاش قمن . وأنا لشقتى فيك عاوزك تكون أيدى اليمين يامرسى .
- مرسى:** خدامك ياريس فواز .
- فواز:** متقولش أكده يامرسى . أحنا مع بعض . وأنا اللى عاوزه بس / أنك تكون أمعاى .
- مرسى:** شكلك عاوز حاجة . قول ياريس . فيه أیه .
- فواز:** عبد الله حندل .
- مرسى:** بيتكلم فى حقك كتير . تحب اخلاصك عليه . ؟
- فواز:** لع . أدبه بالكلام .
- مرسى:** علم . وهاتصل بیک إزای .
- فواز:** أنا اللى هتصل بیک .
- محمجوب:** خالى بره ياريس .
- فواز:** قوله يدخل يامحجوب « يدخل الخال وخلفه هند »
- جهزت السلاح اللى طلبته .

**الخصال:** جاهز ياريس .  
**فـواز:** وأنت ياريس . الهيش اللي قلتلك عليه ؟!  
**مـرسي:** جاهز . ولا حدش يعرف مكانه .  
**فـواز:** وأنت ؟  
**مـرسي:** لو عاوزنى أنسى مكانه . أنساه .  
**فـواز (لهند):** هتعيشي معاي في الهيش ياهند ؟  
**هـند:** أنا معاك عالخلوة والمره ياراجلى .  
**مـحجوب:** وأنا ياعمى . جاي معاكم ؟  
**فـواز:** أنت قبل منى يامحجوب . مقدرش أمشى من غيرك .  
**هـند:** وخوى على رهن أشارتك . هيكون دراعك اليمين .  
**فـواز:** أنا اللي اختار دراعى اليمين ياهند « نلاحظ تغير أسلوبه »  
( .. يتحرك ويمسك بيده كبراج كان معلقا على الحائط ويضرب به فى الهواء .. )  
دى سكتى « يكلم نفسه » أنتم اللي اختارتوا سكتى .  
سيبولى حاجة أختارها بإرادتى . أنا اللي هاختار الطريقة اللي هتعامل بيها معاكوا ومع الناس .  
**هـند:** أنت سيد الرجال يافواز .  
**فـواز:** « يضرب بالكبراج فى الهواء » ريس فواز ياهند .  
« لحظة صمت »  
اتفضلوا بره دلوقت . « يخرجون استنى أنت يامحجوب ( يقترب محجوب منه . يميل فواز عليه يحدثه ) .



- فـواز:** أنت الوحيد اللي حاسس بأنه صادق امعاى .
- مـحجوب:** أنت كل حاجة لى ياعمى .
- فـواز:** بس أنا مش بالقوة اللي فى بالك يامـحجوب . أنا خايف .
- مـحجوب:** لع . متقولش اكده ياعمى . أنت أكبر ماالخوف .
- فـواز:** الخوف مالوش كبير .
- مـحجوب:** لكن أنت الناس كلها بتخاف منك .
- فـواز:** خوفهم مش منى . خوفهم من ده « يشير على السلاح » . وأنا ماكنت عاوز يكون السلاح هو اللي بينى وبينهم . لكن لع . كان لزمًا يكون اكده . همه اللي اضطرونى / الطريق ده هو اللي يجعل الناس تعطيك حـقـك . مايجعلهاش تطمع فيك / أنت يامـحجوب لازم تتدرب على السلاح من دلوقيت .
- مـحجوب:** أشيل سلاح ياعمى ؟!
- فـواز:** هو اللي هيحميك . أنا هاديلك حـتـة سلاح / تحافظ عليها قد روحك / السلاح اللي تحميه يحميك . مش عاوزك تكرر غلطة بوك اللي رفض يشيل سلاح .
- مـحجوب:** اللي تشوفه ياريس .
- فـواز:** خليك دايمًا ملازمى يامـحجوب . أنت مش ابن خوى ويس . أنت ابنى . عارف يعنى أيه / أنا ماخلفتش صحيح . لكن أنت عوضى عن الخلف يامـحجوب .
- مـحجوب:** وأنا بحبك قوى ياعمى « تدخل هند » .
- هـند:** خوى على عاوزك ياريس « يدخل على » .

|         |                                                       |
|---------|-------------------------------------------------------|
| عَلَى:  | مساء الخير ياريس .                                    |
| فَوَاز: | عاوز أيه يا على ؟                                     |
| عَلَى:  | أقعد أول ياريس . أنت ديمًا ...                        |
| فَوَاز: | قول طوالى يا على . أنا ماعدلش روح ولا صبر .           |
| هَنَد:  | ده ده ماتهدى أمال يافواز .                            |
|         | « يضرب بالكرياج فى الهواء » .                         |
| فَوَاز: | مالكيش صالح ياهند . أخرجى أنت .                       |
|         | ( تخرج هند وتأخذ محجوب فى يدها )                      |
| فَوَاز: | أتركى الولد أنا عاوزه معاى .                          |
| هَنَد:  | اللى تشوفه ياريس « تخرج وحدها »                       |
| فَوَاز: | خير يا على .                                          |
| عَلَى:  | البرادعة عاوزين يشوفك .                               |
| فَوَاز: | وهيعوزونى ليه يا على .                                |
| عَلَى:  | ماخبرش ياريس .                                        |
| فَوَاز: | يبقى مرسى يوصل لهم ويشوفهم عاوزين أيه .               |
| عَلَى:  | عاوزينك أنت ياريس وإلا كانوا قالوا لى عاللى           |
|         | عاوزينه وبعدين . همه قالوا .. قالوا ... « فى تردد » . |
| فَوَاز: | قالوا أيه يا على . ؟                                  |
| عَلَى:  | قالوا أنهم مش عاوزين مرسى ياخا -                      |
|         | بالموضوع                                              |
| فَوَاز: | مرسى واحد من رجالتى يا على وكان لازم ترد عليهم        |
|         | بالقول ده .                                           |
| عَلَى:  | حُصل ياريس . لكن أنا بابلغك بكل اللى قالوه . وأنا     |

عن نفسى مش مرتاح لهم / وهند مرتك قالتلى أن  
البرادة ...

**فـواز:** « فى غضب » : وأيه اللى بلغ هند بالكلام ده ؟  
**علـى:** أنا ياريس / قبل ما أدخل .  
**فـواز:** آخر مرة يا علىّ تعمل اكده . الكلام يكون امعاى .  
**علـى:** أنت اتغيرت ياريس .  
« تدخل هند بالشاى » .

**محجوب:** أقول رأيي ياريس .  
**فـواز:** أتكلم يا محجوب .  
**محجوب:** خالى علىّ يروح لهم مع مرسى .  
**هند:** كلامك زين يا محجوب . أنت الرئيس يافواز . وخليك  
ديما للأمور الكبيرة .

**فـواز:** « ضاربا بالكرياج فى الهواء » توصلهم  
يا علىّ وتبلغهم بأنى وافقت أقابلهم / لكن هما  
اللى يجونى .

**علـى:** يقابلوك فين ياريس ؟ احنا مش عاوزين حد يعرف  
مكانك .

**فـواز:** تبلغهم بالكلام ده / والمكان .. هنبغهم به بكرة .  
**علـى:** اللى تشوفه ياريس .

**فـواز:** تقولهم كمان .. كبير البرادة هو اللى يقابلنى .  
ولو حده .

**هند:** ماتخليك أنت هنا يافواز . وابعتلهم خالك واهو برضه  
هيعرف يتصرف ويتفاهم معاهم .

**فـواز:** ماتدخلي في شغلي ياهند .  
**هـند:** أنا مابتدخل في شغلك ياسيد الرجال . أنا بس خايقة عليك .

**فـواز:** خلاص . روح أنت يا على . بلغهم باللي قولتلك عليه .

**على:** يوصل ياريس . سلام عليكم « يخرج » .

**فـواز:** وأنت يامحجوب . أدخل نام في سريرك .

**محجوب:** تصبح على خير يا عمي « يخرج » .

**هـند:** فواز / أنا عاوزاك تسمعني .

**فـواز:** اتكلمي ياهند .

**هـند:** أنت أعصابك بقت تعبانة . وتعامل كل اللي حواليك بعصبية .

**فـواز:** أرجوك ياهند أنا تعبان دلوقيت ومش عاوز اتكلم مع حد .

**هـند:** وأنا خايقة عليك / ولازم أوضحلك حاجات أنت مش واخد بالك منها . كل اللي حواليك هنا مخلصين لك . كلهم رجالتك وخايفين عليك . أنت الراجل بتاعهم اللي يسندوا زهرهم عليه ، عشان اكده لازم ترخي معاهم ...

**فـواز:** بس لازم أعاملهم اكده . مش علشان أعصابي تعبانة . لأ / عشان عضمهم ميقلواش على .

**هـند:** بس دول كلهم بتوعك . خالك وخوي على . وصاحبك مرسى . وأنا / يعني مافيه حدا غريب تخاف منه أو من غدره .

- فـوـاز:** أنا فعلا اتعلمت منك كثير يا هند . بس معلش سيبيني دلوقيت أتعامل بطريقتي اللي أنا شايفها صُح .
- هـنـد:** اللي تشوفه ياريس . فيه حاجة تانية عاوزة أقول لك عليها .
- فـوـاز:** أيه تاني .
- هـنـد:** يافواز . أنت شاب ومن حقك تفرح بخلفك لكن أنا ...
- فـوـاز:** هند . ماتتكلمي في الموضوع ده .
- هـنـد:** أنا مش عارفه أقولك أيه يافواز . بس ده نصيبي . قطعت الخلفة في السنة اللي اتجوزتني فيها .
- فـوـاز:** قلتلك يا هند . أنت مرتي ومفيش شئ مالى بتقوليه ده بيشغلني . ثم أنا عندي محجوب ابنك وابن خوي أنا أبوه اللي مريبه . مش عاوزك تتكلمي في الموضوع دا تاني / اللي أنى ظلمك امعاى سيبتي البلد وقاعدة امعاى اهنه هنه وسط الهيش اللي ماحدش يعرف مكانه حتى القريبين لنا .
- هـنـد:** انت جوزي ولازم أكون معاك عالخوة والمرة .
- الـراوى:** الخوف رمى بذوره جوه القلوب .
- واما لخصاد آن أوانه بين الضلوع .
- « يحكى » وفواز ياسادة ياكرام / خافت الناس منه وزى ماعرفنا بقى مطارد / ساب داره وراح يعيش وسط الهيش .
- وجـل ٣:** معلش ياريس ولو فيها رزاله . الهيش يعنى أيه ؟!
- أصلها كلمة قبلى . أعذرنا أحننا ناس بحاروة .

## الراوي

«يحكى» : الهيش ياسيدى عبارة عن مكان وسط المزارع الناس بتعمله وتدارى فيه . ونرجع لمرجوعنا ياسادة ياكرام ونقول أن فواز صيته وصل البلاد الثانية اللى حوالىهم / وبقت الناس فى كل قرية وفى كل مكان أصبحوا يتكلموا عنه وعن بطشه / وفواز ياكرام بقى يباع ويشترى / يعنى الناس بقت بتأجره عشان يعمل لها مهمه بأجرته . مهمة قتل . سرقة . تسميم مواشى ...

«منشدا» :

بقى كل واحد يحتاج شجاعة يروح لفواز .  
كل واحد يحتاج لتار مافى عنده غير فواز .  
كل من يحتاج سكاته ماعنده غير فواز .  
كل من يحتاج كلام يجرى ويشترىه من فواز .  
«يحكى» :

باختصار . كل شئ فى البلد بقت المشورة فيه لفواز .  
لو واحد خد بتاره . يكون فواز المطالب برفع التار /  
ويأخذ أجره / ويرجع ويرفع التار عن اللى قتله /  
ويأخذ برضه أجره . فواز بقى من خوفه مابيرفضش أى عرض قدامه وبدون تفكير .

« مشهد كبير البرادعة وعلى بين المزارع »

الكبير:

الريس فواز اتأخر .

على:

الريس زمانه جاى . انتظر ياراجل .

**الكبير:** أكثر من أكده يا على ؟  
**على:** مهل نفسك شويه يا كبير البرادعة .  
**الكبير:** أكثر من أكده / ساعة قاعد القعدة دي يا على ، أنا  
 كبير البرادعة . يرضيك أكده .. ؟  
**على:** أنت هتقابل الريس فواز . عارف يعنى أيه الريس  
 فواز .  
**الكبير:** عشان أكده أنا جيت بنفسى .  
**على:** مش أنت اللى جيت . الريس هو اللى طلبك . خلى  
 كلامك مضبوط يا كبير . صُح اكده .  
 ( يدخل فواز ومعه محجوب ) .  
**فواز:** طلباتك ؟ !  
**الكبير:** « مرتيكاً » الريس فواز . أنا . أنا .  
**فواز:** طلبت تقابلنى . طلباتك ايه ؟  
**الكبير:** أحنا . أحنا ...  
**فواز:** أنت أيه وانتوا مين . اتكلم أنا مش هقف أكثر من  
 تلت دقائق أمعاك .  
**الكبير:** أحنا عيلة البرادعة لينا تار ومفيش غيرك ينفذه .  
**فواز:** وليه مايخدش بالتار صاحب الدم . واحد من  
 عندكم .  
**الكبير:** لو نفذنا هيجولك ويطلبوا منك تأخذ التار منا . واحنا  
 مانقدر نتعداك ياريس .

- فـواز:** واحد من رجالتى كان ممكن تنهى معاه  
الاتفاق . / يبقى كان ليه إصرارك أنك تقابلنى . على  
العموم . على هينهى معاك الاتفاق . وهادفك تمن  
جيتى اهنه ياكبير البرادعة .
- الكبير:** مش تعرف مين اللى هناخد منه التار .
- فـواز:** أكبر راس فى أى بلد مش هتكبر على الرئيس  
فواز .
- الكبير:** معلش . أعرف مين ويعد أكده أمشى .
- فـواز:** هيكون مين ياراجل اتكلم .
- الكبير:** هتكلم بس عاوز نكون لوحدنا .
- فـواز:** أخرج يا على « يخرج على » . مين انطق ؟
- الكبير:** مرسى الدغيدى .
- فـواز:** مرسى . ؟! راجلى ؟! أنت بتقول أيه ؟
- محبوب:** أنت أتجنيت ياراجل !
- الكبير:** أسمعنى ياريس . أكمل كلامى أول .
- فـواز:** (غاضبا) : مرسى دا واحد من رجالتى . وصاحبى .  
والبرادعة تعرف زين أنه دراعى اليمين .
- الكبير:** كل واحد مالبرادعة هيعطيك فدانين . يعنى هتاخذ  
٣ فدان .
- فـواز:** حتى لو البرادعة أدتنى طينها كله .
- الكبير:** وعشر تلاف جنيه . تأخذهم قبل ماتم عمليتك .
- فـواز:** دا واحد من رجالتى ياكبير البرادعة .



**الكبير:** والسلاح اللى هتستعمله هيكون هدية مالبرادة  
للريس فواز . وادى طبنجتي اتفضل يريس .  
وهنعطيك حته آلية كمان .

**فواز:** اسمع ياراجل . أنت ترجع للبرادة . تقولهم فواز  
مايبعيش واحد من رجالته ولو بكنوز الدنيا .

**الكبير:** حتى ولو كان خاين ؟

**فواز:** أخرس . أنا رجالتى ...

**الكبير:** « يقاطعه » كلّ ماعليك طبنجة . وأنا عارف  
مكانها . إسألوه عن عملية الدهاشنه . وهو  
هيبخبرك ...

**فواز:** مرسى !. الطبنجة ! مرسى اللى كلّها على ؟

**الكبير:** إسألوه يريس .

**فواز:** أنا ماسألش . أنت صادق وأنا واثق من كلامك .  
لأنك ماتجرؤش . ولا أى واحد مالبلد كلتها يجرو أنه  
يكذب على .

**محمجوب:** عمى ؟! ريس فواز . أنت هتصدقه !؟

**فواز:** أسكت أنت يامحمجوب . اسمع ياكبير البرادة .

مش فواز اللى يغدر برجالتة . حتى ولو غدر  
منهم واحد . أنا أعرف أحاسبه بطريقتى . إنما أنا  
ماغدرش براجل كلّت معاه عيش وملح . مع السلامة  
( يهم بالخروج ) ..

إسمع مش عاوز حد يخبر بموضوع الطبنجة ده .

**الكبير:** أوامرك يريس .

**فـواز:** ولو حد مس شعره واحدة من مرسى . أنا للى  
هتصدّرله . وساعتها البرادة كلها مش هتكفينى تار  
فيه . مع السلامة .

**الكبير:** سلام ياريس « يخرج » .

**محبوب:** تسلم ياريس « فواز لايرد » .

**محبوب:** أنا كنت خايف تكون .

**فـواز:** تبقى لسه معرفتش مين عمك / معرفتش إزاي تكون  
ريس « فواز يكلم نفسه » . لكن المارة جواية مالغدر من أعز  
الناس . صاحبى ودراعى اليمين !! مرسى . أنا مش مصدق  
نفسى .

**محبوب:** وناوى على أيه ياريس .

**فـواز:** هأحرص منه . لكن مش هخونه .

**الـراوى:** فواز يارجالة كان جواه خوف . ودخل جواه الشك وحس  
بالوحدة . بقى يشك فى كل اللى حواليه . فواز ياسادة  
ماعاد بيرتاح . ماعاد يأمن ينام . الناس كلها تخافه /  
لكنه مابيعرف ينام ماالخوف .

**فـواز:** أنا ما كنت عاوز الناس تخاف منى .

**الـراوى:** الطريق كان قدامك وأنت اللى اختارته .

**فـواز:** « يكلم نفسه » الطريق كان غصب عنى / مشيت فيه  
ومش بخوطرى .

**الـراوى:** لكن أنت اخترت واللعة عجبته ومشيت فيها .

**فـواز:** « يكلم نفسه » الناس بتخاف منى لكن الخوف جواى  
بيقتلنى . الخوف مالغدر .

**الـراوى :** فواز زرع خوف فى الناس / لكن الخوف مرض /  
والمرض مُعْدٍ . وفواز ماكنش مِتَحَصَّن ولا كان مِطْعَم ضد  
الخوف . انتقلت العدوى جواه .

### « مشهد فواز وهند »

« فواز وحده . تدخل عليه هند فى الهيش »

|                                                |                |
|------------------------------------------------|----------------|
| أش بيك يافواز مالك . خبر ايه .                 | <b>هند :</b>   |
| تعبان . تعبان قوى ياهند .                      | <b>فـواز :</b> |
| سلامتك . سلامتك يافواز .                       | <b>هند :</b>   |
| تعبان . ومحتاجلك ياهند .                       | <b>فـواز :</b> |
| أرمى عليا تعبك وأنا أشيله عنك .                | <b>هند :</b>   |
| محتاجلك زى زمان . ويمكن أكثر .                 | <b>فـواز :</b> |
| وأنا معاك . ماسبتكش أبدا . أنت اللى غيرت       | <b>هند :</b>   |
| طباعك كل يوم تبعد عنى . قرب منى يافواز أنا     |                |
| عمرى بعدت عنك . فضفضلى باللى جواك .            |                |
| اللى جوايا كثير / مَحْدَش يقدر يشيله .         | <b>فـواز :</b> |
| أرمى علىّ وهو احنا نشيله مع بعض .              | <b>هند :</b>   |
| مش عارف أقولك ايه .                            | <b>فـواز :</b> |
| ماقلتلك مالأول . بلاش مرسى . علىّ خوى كان يبقى | <b>هند :</b>   |
| دراعتك اليمين .                                |                |
| مش دا المهم ياهند . الموضوع أكبر من اكده . أنا | <b>فـواز :</b> |
| محتاج لضهر يحمينى .                            |                |
| أحميك بروحى يافواز .                           | <b>هند :</b>   |

**فـواز:** عارف ، أنت قداها وقدود . لكن مش فواز اللى تحميه  
حُرمه / وأنت عارفه اكده !

**هـند:** يبقى خوى علىّ / ده أكثر واحد أثق فيه .

**فـواز:** مقدرش / أكذب عليك لو قلت أنه ينفع . علىّ زيه زى  
مرسى .

**هـند:** يبقى خالك .

**فـواز:** خالى كبير . كبر ماينفعش يكون ضهر يحمينى .

**هـند:** يافواز ما تحيرش نفسك .. أنا أقدر أحملك .

**فـواز:** أنا متأكد من كلامك ده ياهند / بس . بس .

**هـند:** أنا مش حُرمه يافواز / كل البلد عارفه اكده . عارفه  
أنى بميت راجل .

**فـواز:** أنتى فعلا بميت راجل . بس زى ماقلتلك .

**هـند:** لولا الملامة لقلتلك محجوب يحملك .

**فـواز:** ياريت . لكن لوحده مش كفاية ، ياريت . كان عندى

ولاد . أنا بدأت أعرف يعنى أيه ولد من صلب الواحد .

بدأت أعرف أزاي الواحد ينام وهو مطمئن لما يكون

عنده ولد يحرسه ويخاف عليه . أنا خايف ياهند

مالغدر . مش مطمئن لأى حد .

**هـند:** خلاص يافواز . يبقى ما فى غير محجوب . وهو

ولدك وأنت اللى مربيه .

**فـواز:** لكنه لسه صغير . أنا باحميه . أنا ضهره .

**هند:** الصغير بكبره يكبر . واهه أنت وهو هتكونوا  
لبعض .

**فواز:** الولد لسه عوده طرى مايقواش للدفاع عن  
نفسه . ومحجوب لازماً ينام وهو مطمئن بأنى ضهره  
اللى يحميه . هيكون ضهرى لكنى لازماً أحافظ  
عليه / ولما يقوى عوده ويكبر يبقى يحمينى .  
إنما دلوقت ...

**هند:** أسمع يافواز . هو ده الحل ومفيش غير اكده . أنا  
ومحجوب .

**فواز:** يبقى لازماً تدربوا على السلاح من دلوقت .  
**هند:** نتدرب يافواز / ولاتفكرش فى شئ . خالك اللى  
هيدرنا .

**فواز:** لع / أنا اللى هدرىكم . كنت باحلم بعزوة أقعد  
وسطيها / أدربها / كنت باحلم بعزوة تحمينى وارتاح  
ليها وأطمئن من ناحيتها .

**هند:** لساك يافواز بتحلم بالعزوة . بتحلم بالولاد . على  
عينى يافواز أنت عارف أن ده الشئ اللى مش بيدى .  
أنت عارف أنى خلاص قطعت الخلفة . لكن أرجع  
وأقول . أنت ذنبك أيه . لو لساك بتحلم بالولاد يبقى  
لزاماً تتجوز . أيوه تتجوز يافواز . بقولها لك بلسانى  
من ورى قلبى . بقولها لك يافواز قبل ماتفكر فيها  
لأجل تكون جت منى أنى .

**فواز:** هند . أنتى بتقولى أيه ؟

**هــنـد :** اتجوز يافواز . هاتلك اللى تخلف وتجبيلك الظهر اللى  
من صلبك . أنت لسه صغير يافواز . أنت .

**فـواـز :** ماتقوليش اكده ياهند . ده أنتى اللى لى فى الدنيا .  
أنتى الوحيدة اللى بارتاح لها . مش ممكن أفكر فى  
أنى أخسرك . مش ممكن ..

( خبط عالباپ )

**هــنـد :** ياترى مين اللى جاى دلوقيت . أقوم أشوف .  
« يسمع صوت مرسى » ده مرسى . اتفضل يامرسى .

**فـواـز :** خير يامرسى . فيه أخبار جديدة .

**مـرـسـى :** العوايدة .

**فـواـز :** مالها ؟

**مـرـسـى :** عاوزين يصفوا حسابهم مع البرايشة .

**فـواـز :** اتفق معاهم .

**مـرـسـى :** طالبين يتفاهموا معاك أنت .

**فـواـز :** قلتلك اتفاهم معاهم . اتفق وخلص .

**مـرـسـى :** أنت برضه الرئيس ولك كلمتك اللى تمشى على الجميع

وأنا شايف أن وجودك بينهم ضرورى . عشان . عشان .

**فـواـز :** عشان أيه يامرسى .

**مـرـسـى :** يعنى . بيحاولوا يميلوا دماغ خالك / فيه ناس

عاوزينه يدخل ويحل الموضوع سلمى .

**فـواـز :** أنا مش عارف أيه اللى رقق قلبه اكده . أيه الموضوع

بالظبط مش فاهم . واحد بقى حنين وقلبيه رق

والتانى على ومن يومه وأنا مش مرتاحله / فيه

- حاجات فى تصرفاته مش فاهمها . وأنت .
- مرسى :** أنا ؟! فيه أية ياريس .
- فواز :** مفيش يامرسى . أنت تروح دلوقيت وتتفق مع العوايدة .
- مرسى :** مش قبل ماتقولى . أنت بتفكر فى أية ياريس .
- فواز :** مش وقتته يامرسى . قلتلك تروح على العوايدة وتخلص امعاهم .
- مرسى :** لكن همه عاوزين الريس ومُصرين على اكده .
- فواز :** وأنت رأيك أية .
- مرسى :** رأيى أن وجودك ضرورى وأنتك لازمًا تظهر كل حين ومين وسط الناس .
- فواز :** يبقى تبلغ العوايدة بأنى هستنى كبيرهم بكره . وأبعت للبرايشة كمان .
- مرسى :** البرايشة ! . ليه ياريس ؟
- فواز :** نفذ اللى بقولك عليه . كبير البرايشة يجينى بعد ميعاد كبير العوايدة بربع ساعة .
- مرسى :** والمكان ياريس هيكون فين ؟
- فواز :** هخبرك عليه تبلغهم بيه بكره .
- مرسى :** أوامر تانية ياريس ؟
- فواز :** لع / مع السلامة أنت ، ابعت خالى .
- مرسى :** حاضر ياريس . السلام عليكم . « يخرج . تدخل هند »
- هند :** كان عاوزك فى أية مرسى ياريس فواز .
- فواز :** مشكلة بين البرايشة والعوايدة . وطالبين مقابلتى .

|          |                                                                                                                                                                         |
|----------|-------------------------------------------------------------------------------------------------------------------------------------------------------------------------|
| هتند :   | وهتقابلهم ؟                                                                                                                                                             |
| فواز :   | أنا قررت ومش هافكر تانى .                                                                                                                                               |
| هتند :   | من غير ماتاخذ رأيي يافواز .                                                                                                                                             |
| فواز :   | أنا عايز أقعد لوحدي شوية ياهند .                                                                                                                                        |
| هتند :   | لع . أنا هقعد معاك شوية . أنت محتاج ...                                                                                                                                 |
| فواز :   | أرجوك ياهند .                                                                                                                                                           |
| هتند :   | يافواز ماتبعدهش عني . أنا بافكر في مصلحتك . أنت<br>لسه صغير . وخبرتك في الدنيا قليلة .                                                                                  |
| فواز :   | أرجوك ياهند سيبيني لوحدي .                                                                                                                                              |
| هتند :   | أنا مش عارفه . أنت ليه بتفكر كثير . الناس كلها<br>بتخاف منك وكل يوم خوفهم بزيد . تبقى بتفكر في آيه ؟<br>وآيه نتيجة الخوف ده ؟                                           |
| هتند :   | لو عندك حاجة تانية قولي عليها .                                                                                                                                         |
| فواز :   | « يكلم نفسه » مفيش قدامي غير الطريق ده .                                                                                                                                |
| هتند :   | أنا كل خوفي عليك أنت .                                                                                                                                                  |
| فواز :   | خايفه على لاضيع منك .                                                                                                                                                   |
| هتند :   | ماتفرقش . لكن أني خايفة عليك زي ابني .                                                                                                                                  |
| فواز :   | هند . أنا اخترت سكتي غصب عني . ماتحوليش<br>تأثرى على . أنا طالما بقيت في الطريق ماينفعش<br>أكون نص نص . لازماً أكون شديد . مش لازم أضعف<br>« يضرب بكرياحه في الهواء » . |
| الراوي : | فواز ده كان يارجال .<br>ياسعد يااكرام كان قبل هند ضعيف .                                                                                                                |



لكن قوى بيها / سمع الكلام منها / شق  
الطريق بيها .

واشتد عوده وساعده . ما غاب للحظة عليها .  
« يحكى » لكن فواز ياسادة . لما عوده قوى  
وحس أنه مش محتاج لمساعدة حد . أصبح  
عنيد الرأى / ماعاد يحب يسمع لكلام أى حد/  
ولا يأخذ برأى اللى حوله . استغنى عن مشورة  
هند / ماكنش يلجأ لها إلا لما كان يحس  
بالخوف جواه .

### « مشهد فى وسط المزارع »

فواز وكبير العوايدة ومحجوب .  
طلباتكم أيه يا كبير العوايدة .  
لنا أرض عند البرايشة . وأنت اللى هتجيبولنا .  
وضح . أنا ما عندى وقت؟!  
الأرض حسنين ولد هاشم البريشى واضع يده عليها .  
لأنها أرضه .  
الأرض ملك خوى محمد الصغير . ودفع نص تمناها .  
واتفقنا يدفع النص التانى بعدها بشهرين .  
قصر فى الكلام .

خوى رفضوا يعطوه الأرض . وطلبوا ضعف التمن الباقى .  
وايه طلباتكم ؟  
عاوزين ناخذ الأرض . وياخدوا بقيت حقهم حسب  
الاتفاق .

فـواز:

كـالعوايدة:

فـواز:

كـالعوايدة:

فـواز:

كـالعوايدة:

فـواز:

كـالعوايدة:

فـواز:

كـالعوايدة:

- فـواز:** وإن رفضوا .
- كـالموايدة:** احنا قصدنا الريس فواز عشان ماحدث يقدر يكسر كلامه .
- فـواز:** المبلغ الباقي كام ؟
- كـالموايدة:** مدفوع عشرين ألف وياقي لهم عشرين .
- فـواز:** أنا لى عشرة آلاف .
- كـالموايدة:** نخليها خمسة ياريس .
- فـواز:** عشرة ( يضرب بالكرياج فى الهواء ) .
- كـالموايدة:** وجب ياريس .
- فـواز:** اتفضل مع السلامة تقعد جنب الساقية هتلاقى مرسى هناك . تقعد امعاه . ولما ابعت لك محجوب تعاود هنا تانى .
- كـالموايدة:** أوامرك ياريس « يخرج » .
- « يتحرك فواز إلى اليسار »
- فـواز:** « منادياً على » . يا على « يدخل على » ك البرايشة معاك ؟
- على:** موجود ياريس .
- فـواز:** اجعله يحضر هنا .
- على:** أوامرك ياريس .
- فـواز:** أنت يامحجوب لازمًا تاخد بالك من كل شئ بيدور حوالينا . أنا واخذك امعاى فى كل مكان عشان تتعلم .
- تاخذ خبرة / ماتكونش لحمة طرية لحد .
- محجوب:** أنا ياعمى واعى لكل شئ . أطمئن المحجوب راجل « يدخل على ومعه كبير البرايشة » .
- فـواز:** أنت كبير البرايشة .

|             |                                                 |
|-------------|-------------------------------------------------|
| لك البراشة: | خدامينك ورجالتك ياريس فواز .                    |
| فـواز:      | أرض العوايدة .                                  |
| لك البراشة: | دى أرضنا ياريس . العوايدة مالهم أرض عندنا .     |
| فـواز:      | مادفعوش تمنها . يبقى مالهم أرض عندنا .          |
| لك البراشة: | أنتوا اللي خلفتوا الاتفاق .                     |
| فـواز:      | اتفقنا على أربعين ألف لكنهم مادفعوا غير عشرين . |
| لك البراشة: | أرادوا يدفعوا العشرين بعد الشهرين اللي سامحتوا  |
| فـواز:      | فيهم . لكنكم رفضتم .                            |
| لك البراشة: | الأرض جابت ٨٠ ألف .                             |
| فـواز:      | لكن أنتوا اتفقتوا وبعثوا .                      |
| لك البراشة: | ماوفوش الاتفاق . الدفع كان متأخر .              |
| فـواز:      | من غير مانطول فى الكلام . البراشة رأيهم أيه ؟   |
| لك البراشة: | العوايدة يستردوا فلوسهم / العشرين ألف اللي      |
| فـواز:      | دفعوها ، ويا دار ما دخلك شر .                   |
| لك البراشة: | وان رفضوا ؟                                     |
| فـواز:      | مش هيرفضوا كلمة الريس فواز . ماحدث فى البلد     |
| لك البراشة: | كلتها يجروء يكسر كلام الريس فواز .              |
| فـواز:      | أنا لى عشرة تلاف . « موجهها كلامه لمحجوب »      |
| المحجوب:    | أجرى نادى كبير العوايدة يامحجوب .               |
| لك البراشة: | حاضر ياريس « يخرج » .                           |
| فـواز:      | نخليهم خمسة ياريس .                             |
| لك البراشة: | عشرة آلاف « يضرب بالكرباج فى الهواء » .         |

**لك البراشة:** وَجَبْ يَارِيس . لكن مين من العوايدة اللي موجود هنا ؟  
**فواز:** الشيخ مهاود أخو محمد العواد .  
**لك البراشة:** وجاي هنا ليه ؟  
**فواز:** عاوز أرضه . وأنا دلوقت هتفق معاه قدامك وننهي مشكلة الأرض دي .  
**فواز:** « يدخل مرسى ومعه كبير العوايدة » .  
**فواز:** اسمع ياشيخ مهاود / أحنا اتفقنا على عشرة آلاف ، جاهزين ؟  
**لك العوايدة:** فلوسك جاهزة ياريس .  
**فواز:** وأنت يا حسنين / العشرة آلاف بتوعى اللي اتفقت فيهم جاهزين .  
**لك البراشة:** حقك محفوظ ياريس .  
**فواز:** وضح كلامك الفلوس جاهزة ؟  
**لك البراشة:** « يضرب بالكرياج فى الهواء » .  
**فواز:** « مرتبكا » جاهزة . جاهزة ياريس .  
**فواز:** « موجهها كلامه لمرسى » ترروح معاه يامرسى هيعطيك العشرة تلاف . وأنت يا على « موجهها كلامه لعللى » ترروح مع كبير العوايدة تجيب اللي اتفقنا عليه .  
**على:** حاضر ياريس .  
**فواز:** شوف ياشيخ مهاود . أخوك دفع الفلوس . وأنا مايرضىنى أنك تسترد فلوسه . عشان اكده نص الأرض اللي يَمُستكُم هتكون ملك خوك .  
**فواز:** كمان يا حسنين الأرض تَمَنَّاها ارتفع . وعشان اكده

أنا شفت أن من حقق تبيع النص اللي يمتك بالتمن  
اللي يعجبك .

لكن ياريس احنا جاهزين بباقي المبلغ اللى اتفقنا عليه  
مستعدين ندفعه دلوقت وناخد الأرض كلها .

واحنایاریس جاهزین بفلوسهم نرجعهلهم وتبقى أرضنا  
عندنا زی ماهی ومن حقنا .

اللى بقوله ده هو اللى هيتنفذ واللى هيصير « يضرب  
بكرباجه فى الهواء » . حسنين أنت تتمم اجراءات  
ملكية نص الأرض ، وأخوك يا شيخ مهاود . ميعرفش  
فى بيع الأراضى ولا فى شراها / عشان اكده لو فكر  
فى بيعها يجينى وأنا أبيعها له فى ظرف يومين .

لكن ياريس .

مالكنش . الموضوع انتهى . قوم بينا يامحجوب /  
على / أنت هتجيب الفلوس من كبير العوايدة / وانت  
يامرسى تقوم دلوقيت تجيب الفلوس من كبير البرايشة  
واللى يثرثر بالكلام بدون داعى هندفعه التمن . واللى  
يعارض منكم ..

« يضرب بكرياجه فى الهواء » .

فواز حكم ولا ظلم . بلُغَة الفلاسفة / العملية نقدر  
نقول أنها نسبية . مين اتنصف ؟! العوايدة ولا  
البرايشة / اللى اتنصف فواز . والناس خوفها منه  
بيزيد / ويطشه لما بيشوف خوفهم بيزيد . بلُغَة العصر /  
فواز استثمر خوفهم لصالحه .

## كالكوالية:

## ك البراشة:

**فہرستِ واژ:**

## كالموايلة:

فـ \_\_\_\_\_ واز:

## راوی :

« مشهد فواز ومجموعته فى الهيش » .

- فـواز:** أنت يا علىّ اللى هتقوم بالمهمة دى .
- على:** مرسى هيجى معاى ياريس .
- فـواز:** لع . مرسى هيقوم بمهمة تانية / هياخد بتار البرادعة من سالم .
- مرسى:** كنت عاوز أتكلم معاك ياريس فواز .
- فـواز:** مش وقته يامرسى .
- مرسى:** ياريس ماعدت بتكلم معاك !
- فـواز:** أنت اللى هتقوم بمهمة التار دى يامرسى . أسمع بكرة خبر سالم .
- مرسى:** اللى تشوفه ياريس . لكن .
- فـواز:** تضبط نشانك زين يامرسى . المرة اللى فاتت خانك النشان وهرب منك ابن الحوامده . معرفتش تطّخه . لولا أنى كنت متابعك . عرفت مكانه وقتلته / لولا كده كانت فضيحتنا غطت البلد .
- مرسى:** اطمئن ياريس / غلطة وماهتكرر .
- فـواز:** انتوا عارفين أن الأحكام اللى ضدى كتترت .
- فـواز:** يعنى حركتى جوه البلد لزمًا تكون بحساب . يعنى كل واحد منكم لابد وأنه ينهى عملياته بطلقة واحدة . لأننى مش هاتابعه / فاهمين / أنت معاك الآلية بتاعك يا علىّ خد رصاصة واحدة من خالى وشوف شغلك .
- على:** وجب ياريس « يخرج » .

- فـواز:** وأنت يا مرسى « يعطيه طلبة طنبجة » .
- مرسى:** أيه ده ياريس ؟
- فـواز:** طلبة طنبجة . هتنفذ عمليتك بالطنبجة اللي معاك .
- مرسى:** « مرتبكا » أنا .. أنا .. كنت عاوز أتكلم أمعاك بخصوص ...
- فـواز:** « مقاطعا ويضرب بالكرباج فى الهواء » مش وقته الكلام يا مرسى . شوف شغلك .
- « يهم مرسى فى الخروج » .
- فـواز:** « مناديا » مرسى . أنا هغير مكانى هعيش فى حته تانية . يعنى ماتحولش تتصل بيا أنا لما هاعوزك هابعثلك المحجوب . مع السلامة « يخرج مرسى » .
- الخال:** أنت محتاجنا فى حاجة ياريس ؟
- فـواز:** أستنى أنا عاوزك ياخال ...
- الخال:** طلباتك يا فواز .
- فـواز:** « يضرب بالكرباج فى الهواء » ريس فواز .
- الخال:** طلباتك ياريس .
- فـواز:** لما يحتكملك الناس فى مشكلة ، يبقوا بيحتكمولى ،
- عشان اكده يبقى لزمًا تاخذ رأيي .
- الخال:** ما هو الحكم اللي بحكمه بيكون زى رأيك .
- فـواز:** لع ياخال . أنت اتغيرت ، ضعفت . بقيت ...
- الخال:** يا بنى اللي بيحتكمولى ، بيحتكمولى فى مشاكل بسيطة . يعنى حلها بسيط . ميلزمهوش ...
- فـواز:** لع ياخال / ده مش اتفارقنا . إحنا اتفارقنا على الكبيرة والصغيرة .

**الخال :** أنا خايف عليك يافواز . الناس ماعادت بتخاف منك  
بس / لع / دول دلوقيت بقوا بيكرهوك / وأنا باحاول  
أخفف من كُره الناس ليك عشان .

**فواز :** لع ياخال . أنا أقدر أحل المشاكل بنفسى . ومفيش  
داعى لحنية القلب بتاعك دى « تدخل هند » .  
فيه شئ تانى عاوز تقوله . أنا ماشى .

**الخال :** استنى يا حاج . عوزاك .  
**هند :** عايزة أيه أنت كمان ياهند .  
**الخال :** أتجعمص يا حاج . أدخل أنت يامحجوب ريح بدتك .  
**هند :** شوية عشان هتكلم مع خالك .

**محجوب :** حاضر يا امأى « يخرج » .  
**فواز :** عاوزة خالى فى أيه ياهند ؟  
**هند :** أستريح ياخال « يجلس » .  
**الخال :** خير ياهند . عاوزة أيه ؟  
**هند :** بنتك هدايات .

**الخال :** مالها ياهند .. ؟  
**هند :** عاوزة أخطبها منك .  
**الخال :** لخوك على ؟!  
**هند :** لع / أنا طلبّاها معايا إهنة فى الدار . باخطبها  
لفواز .

**فواز :** هند !  
**الخال :** إنتى بتقولى أيه .. إنتى ... ؟!  
**هند :** أنا بعقلى ياخال .



- الخال :** لایمکن تکنونی بعقلک یابتی .
- هند :** فواز عندی کل حاجة . وأنا شایفه انه محتاج لواحدة صغيرة تجیبله الولاد . واحنا مش هنلاقى حد یخاف علیه ویحافظ علی عرضه زی بنتک هدايات . وأهی تبقی برضه من لحمه .
- الخال :** أنا بقول ...
- فواز :** یاخال . احنا . أنا .
- هند :** اسمعنی یاخال أنت مش هتيجيب لبنتك راجل زی الريس فواز .
- الخال :** الريس فواز زين . وسيد الرجالة . وهدايات بتی ماتغلاش علیه . بس أنا بقول یعنی ...
- هند :** نقرا الفاتحة دلوقیت وفي الصباح تجیبها ونعقد علیها .
- الخال :** إیش قولک یافواز « فواز لا یرد ولا یبدی أى حركة » .
- هند :** نقرأ الفاتحة یاخال .
- الخال :** علی بركة الله . نقرأ الفاتحة .
- « یقرأوا الفاتحة » .
- ولا الضالین آمین . مبروک یافواز / هدايات هتکون عندک من بكرة الصبح . سلام علیکم « یرج » .
- هند :** مبروک یافواز .
- فواز :** إنتی لیه عملت اکده یاهند .
- هند :** حبی لیک وخوفی علیک .

**فـواـز:** بس أنا محتاجك ياهند . انتى اللى ادتينى كل حاجة .  
ثقتى فى نفسى . والحب اللى اتحرمتنه من أمى . انتى  
اللى جمدتى قلبى ، أنا محتاجك جنبى ياهند .

**هـنـد:** ومحتاج الضهر اللى يحملك . محتاج للولد اللى من  
صُلبك ، أنت قلتلى اكده . محتاج عزوة كبيرة  
مالولاد .

**فـواـز:** كنت محتاجهم منك ياهند .  
**هـنـد:** وأنا ماعدتش أقدر احققلك اللى أنت عاوزه . كبرت .  
وأنت مالك ذنب . يبقى من حَقك تتجوز بصغيرة .

**فـواـز:** لكن انتى .  
**هـنـد:** أنا معاك . أنت هتعيش معايا اهنه . هنعيش مع  
بعض يعنى هتكون قدام عينى .

**فـواـز:** وأنا هاكون جنبك ياهند . عمرى ما هستغنى عنك .  
**هـنـد:** قوم بينا ننام يافواز . نقعد مع بعض الليلة دى قبل  
العرس ماتأخذك .

**فـواـز:** « يقف » معلهش . أنا تعبانا الليلة . بدى اقعد  
لوحدى . نامى انتى مع المحبوب .

**هـنـد:** اللى تشوفه يافواز . أدخل أنت ربح بدنك . ولو جالك  
النوم نام ولا تخافش . أنا هاقعد إهنه . إَظْمَنُ / أنا  
ضهرك اللى هيحرسك .

**فـواـز:** تصبى على خير ياهند « يخرج » .  
( تتحرك هند وراءه حتى تتطمئن من خروجه . تعود  
فى ثناقل ) .

**هــنـد :** « تكلم نفسها » ادخل ونام يافواز . نام ياحبيبي .  
نام واحلم بالعُرس / صغيرة / جيبها لك بيدي / بيدي  
يافواز / جبتها لك بيدي « غير مصدقة » . جَإي ..  
جَإي .. نار وآيده جوه قلبي / آيده جوايه / أهون  
علّي الموت من اني أشوف اليوم ده / اليوم اللي  
ييقالي شريكة فيك يافواز / جَإي / نام يافواز / نام  
ياحبيبي / نام واحلم بالعُرس الصغيرة اللي هتجيبلك  
الولاد والعزوة / نام يافواز ...

**\*\* ستار \*\***



## الفصل الثالث



**الراوي:** وبإسادة يا كرام . ولا يحلى الكلام إلا بذكر النبي عليه الصلاة والسلام .

**الجميع:** عليه الصلاة والسلام .

**الراوي:** أنا عارف بأنكوا متشوقين تعرفوا باقى الى حصل .

**السيدة:** الشوق لك ولكلامك ياريس .

**الراوي:** بقى بإسادة يا كرام . فواز اتجوز هدايات / واحنا

عارفين بأن هند هى اللى جابتها له بإيدها /

ومن قبل كده كان فواز زى ما عرفتوا زارع

الخوف فى النفوس . والناس عادت كلها بتخاف منه

ومن بطشه . فواز من شدة خوفهم من بطشه عاد

بيخاف . وكل ما زاد الخوف جواهم . زاد جواه . وكل

ما زاد الخوف جواه . زاد فى ظلمه . وأصبح بيحكم

بالسياط ( يشير بيده وكأنها كراچ ) . فواز من

الخوف ظلم .

« منشدا » ياسارق الناس ياساقبهم العذاب والمر

ياساقى الناس ياسارق منهم الأمان والبر

أنت ياللى حالك لاعاد يرضى ولايسر .

اصحى بقى . فوق . انتبه . السنين بتمر

حالك دوامه أصبح محال .

لك نهاية . ولا تظنّيش بأنك راح تستمر .

- السيدة :** يا سلام . يا سلام ياريس . سيد القوالين والله .
- المجودين :** آه والله . الله يبارك فيك . إيه العظمة دي .
- رجل ١ :** من غير مقاطعة . بعد إذنك والنبي يا حاج .
- الراوي :** عاوز إيه يا غالى ؟
- رجل ١ :** عاوز أتكلم شوية . والنبي يا حاج راوى . عاوز أقوم وأقول شوية .
- الراوي :** مش فاهم ! تتكلم تقول إيه ؟
- رجل ١ :** أريحك يعنى على ماتاخذ نفسك .
- رجل ٢ :** هو أنت تعرف تقول حاجة . ياراجل أقعد ساكت .
- رجل ٣ :** بقى معقول نسيب الحاج راوى بجلالة قدره ونسمعك أنت ! . أنت يا ابو نص لسان ! ؟
- رجل ١ :** طب بس اسمعونى ولو كلامى ماعجبش أبقوا أعملوا فى اللى أنتوا عاوزينه . قولولى أسكت ولا تخلونيش أكمل كلامى .
- الراوي :** « يضحك » خلاص . خلاص يا غالى . نسمعه شوية يا جماعة اتفضل ياسيدى . قول وسمعنا .
- رجل ٣ :** ده ده . وده معقول يا حاج . تبقى موجود ونسمع لغيرك !
- الراوي :** معلش ياخوانا . نديه فرصة . اتفضل قول ياسيدى .
- رجل ١ :** فواز وكما قال الراوى ياسادة ياكرام .
- الخوف جوه القلوب زرع .
- رمى بذوره وسقاه وزرعه .



وأما حصاد الزرع آن / مسك العصايا وجمعه .  
الخوف كان جوه القلوب ، ولما زاد داخل الشقوق .  
لكن ياخوف أنت كثير بتتغير / وتتغير نفوس  
الناس / بتتغير ماسبت واحد - خدت الجميع -  
كبير وصغير / ماسبت حد ياخوف فى حاله . خدت  
الجبان قبل الجدع / عششت فى نفوسنا ياخوف  
قاصدى فى نفوس الناس . كنت اللجام للسان . كلام  
كثير بيتقال . لكنه كان فى السر . وحتى كلام السر  
ياخوف اتبدل . اتغير . خافوا من المواجهة ومن  
متاعبك ومن الجوع . خلخلت القلوب الجأشانة بين  
الضلوع . خلخلت قلوبنا . قاصدى قلوب الناس /  
الكبير منهم وقع / واللى وقع . موجوع / هزيت  
عروش ياخوف .

سكنت الناس فى الأكواخ .  
لكن أنت كنت فى البلاط جنب العروش .  
شلت الكفن للضعيف .  
واللى لسانه كان شريف .  
جهزته فى لحظة النعوش .  
ياخوف . كفاية بقى .  
كفاية بقى .

جوانا ماعاد مكان لك ولا مطرح .  
ياخوف كفاية بقى . كفاية بقى أطلع .

- السيدة:** ياسلام . رأيك ايه ياريس ؟
- الراوي:** لا والله يجى منك !
- رجل ١:** تشكر يا حاج راوى .. ده من ذوقك . تُشكروا يارجاله .
- رجل ٢:** مبسوط دلوقت ! أهو أنت خرجتنا من جوه الحكاية !؟
- الراوي:** معلش يارجاله . أهو أحنا سمعناه وريحناه .
- رجل ٣:** وبعدين يا حاج راوى كمل حكاية فواز . عمل ايه ؟
- الراوي:** فواز ماعد واثق فى أى حد حواليه . بقى كل شهر والتانى وأحياناً كل أسبوع . كان يغير المكان اللى عايش فيه . كان بيغير مبيته يلم حريمه وولد أخوه ويتنقل .
- « مشهد فواز يدرب المحجوب وسط المزارع » .**
- فواز:** عاوزك تكون فى الرشاش جدع ذى الطبنجة .
- محجوب:** ياعمى . أنا اتعلمت على الطبنجة بسرعة / لكن الرشاش كبير وتقليل .
- فواز:** متقولش إكده واصل . لزمأً تكون أنت الكبير .
- محجوب:** حاضر ياعمى .
- فواز:** بعد الرشاش هدرّيك على الآلية . لازم الناس كلها تعرف أنك راجل . لزمأً يعرفوا ان ورايا راجل .
- محجوب:** لكن البندقه ياعمى .
- فواز:** هتقول إيه كمان ؟! أمك الحُرمة بتستعملها ولا أجدع راجل فى رجالتى . كَمان مَرتى هدايات دلوقت بتدرب على الطبنجة . وأنت راجل مش حُرمة ، يعنى لزمأً تكون أفضل منهم « تدخل هند » .

**هــنـد :** دهده يافواز . أنا كل مادخل عليكم ألقاك  
بتدريه عالسلاح . بكفاياك أنه بيستعمل  
الطينجة زين .

**فـواـز :** لزماً يتعلم كل شئ . لزماً يستعمل كل أنواع السلاح .  
كان نفسي يكون حاجة كبيرة قوى . كان نفسي أفرح به ،  
لكن غصب عنى . كل يوم بنعيش فى مكان مختلف .  
غصب عنى جعلته يسبب العلامة ويطلع من المدرسة  
عشان يكون جنبى . كان نفسي أشوفه وكيل نيابة  
ولاضابط أو حتى محامى . لكن الظروف حَكَمَت .

**هــنـد :** محجوب إن شاء الله هيكون زين وسيد الرجالة بس  
أنت متفكرش كثير . عاوزاك بس تهدي أعصابك .  
( تدخل هدايات ) .

**هدايات :** انتى سيبانى جوه أشتغل وحدى . ماتيجى تساعدينى  
ولا أنتو جايبنى جارية تشغلونى عندكم ؟

**هــنـد :** ماتكتريش فى الكلام . أدخلى وأنا جايه وراك .  
**هدايات :** اسمع يافواز أنا تعبت ما عدت قادرة أعمل حاجة .  
قول لها تدخل تَكْمُل . أنا عملت اللي قدرت عليه  
( بدلال ) .

**فـواـز :** أدخلى ياهند كملى الشغل اللي جوه .

**هــنـد :** شغل أيه يابت أنتى . إنتى هتتملبنى على ولا أيه ؟

**هدايات :** خليك شاهد يافواز . شايف بتكلمنى إزاي .

**هــنـد :** اسمه الرئيس فواز يابت . ابقى اتحشمى فى الكلام .  
أدخل أنت يامحجوب جوه .

- محمجوب:** حاضر يا امای ( یخرج ) .
- هدایات:** أنا بتکلم مع راجلی یا هند . أَتُكَلِّمُ معاه زی ما أنا عاوزه .
- هند:** إسمع بقی یافواز . ماهو أنت دلعت البت دی علینا . کان لزمًا تعاملها بشدة أكثر من إکده .
- فواز:** هند ( یضربها بالکریاج ) مش حُرْمه اللى هتعلمنى کیف أتعامل مع مَرَّتى .
- هند:** إکده یافواز / دی آخرتها / تضربنى بالسوط عشانها !
- فواز:** أضربك وأضربها . أنا جای هنا بعید عن المشاكل والخوف اللى ملاحقنى فى کل مکان / مش عشان تعیشونى فى جحیمکم .
- هند:** أنا الحق علیا ( موجهه کلامها لهدایات ) أنا اللى دخلتک الدار . أنا اللى جوزتک بیدى . ما کنت أعرف ان جزائى هیکون إکده وبالسریعة دی . أنا اللى جعلته یبقى علیکى .
- فواز:** هند . کفایاک کلام .
- هند:** لع یافواز . لزمًا تعرف الحقیقة . فواز کان متجوزک عشان تجیبى له الولاد ( فى شماته ) لکنک طلعتى مبتخلفیش / رینا مش راید له منك ولاد . أنا اللى خلितه یبقى علیک عشان خاطر بوک . وده کان جزائى ( یدخل محجوب ) .

- محمجوب :** مرسى عاوزك يارسى .
- فواز :** مرسى !. وأيه اللى عَرَفُه مكانى إهنه ؟ عرف إزاي ؟  
أدخلوا دلوقيت جهزوا خلجاتنا عشان بعد ماhtكلم مع  
مرسى هنشوف مكان تانى نِتَاوى فيه . أنا مش عاوز  
أى حد يعرف متوانا .
- الـراوى :** فواز ماعاد له عزيز . ماعاد بيشق فى حد . أصبح  
بیشك فى كل اللى حوالیه / اتنقل من مكان لمكان .  
مرة فى الجب ومرة فى الهيش بين المزارع . بين القلق  
والخوف .
- رجل ٣ :** مضبوط . وهو ده أخرة الطريق اللى مشى فيه .
- الـراوى :** وياترى هتكونوا معاه ولا عليه .
- رجل ٢ :** إهى . طبعاً كلنا عليه .
- الـراوى :** رغم الظروف .
- رجل ١ :** ظروف إيه دى اللى جعلته إكده .
- الـراوى :** يعنى نقول ياعينى على الولد . ولا ياعينى على البلد .
- رجل ٢ :** نقول ياعينى عالبلد . فواز قبل مايتحكم كان عادل .  
والحق كان قدامه واضح . وكان عادل .  
وكان عليه بس يسعى . والحق كان وياه هيتعادل .
- رجل ٢ :** أنا مش عارف الحكاية إيه بالضبط يارجالة . الواحد  
من دول تبقى فيه كل الصفات الطيبة ولما يحكم يتغير .  
يتحَكَّم ويفترى .
- الـراوى :** ماهى الحكاية عصاية مش أكثر . تمسكها للناس تخاف

|                                                                                                                |                  |
|----------------------------------------------------------------------------------------------------------------|------------------|
| ويكده تقدر تتحكم فيهم . هتقول شمال هيكونوا كلهم شمال . وإن قلت يمين هيكونوا كلهم يمين .                        |                  |
| الناس همه اللى جعلوا فواز يتحكم فيهم .                                                                         | <b>رجل ٣ :</b>   |
| ( لرجل ٣ ) قصدك تقول / الناس همه اللى جعلوا العصايا تتحكم فيهم .                                               | <b>الراوي :</b>  |
| (لنفسه) : ( فى بقعة ضوئية لمفرده ) أنا ما عدت قادر على القلق ده .                                              | <b>فواز :</b>    |
| للخوف نتاج . وده نتاج الخوف يافواز . خوف من الخوف اللى عايش فيه الناس .                                        | <b>الراوي :</b>  |
| ماعدت قادر / مطاردة من كل مكان .                                                                               | <b>فواز :</b>    |
| (لفواز) : أعدائك كتروا يافواز .                                                                                | <b>الراوي :</b>  |
| كل اللى حوليا دول جبناء . ما بخاف منهم . لكن الشرطة هي اللى عملت لى زعر .                                      | <b>فواز :</b>    |
| لو أنت عاوز الرأي الصُح / سلم نفسك . وارتاح .                                                                  | <b>الراوي :</b>  |
| أوعى تفكر فى اكده . أوعاك تسلم نفسك يافواز .                                                                   | <b>صوت هند :</b> |
| لع . مش ممكن / أنا أقتل روحى . ولأنى أسلم نفسى .                                                               | <b>فواز :</b>    |
| أنا بقول اللى عايش فى السجن أرحم من اللى عايش فى الكوخ / وكل اللى حوله خوف ( تدخل هدايات ) .                   | <b>الراوي :</b>  |
| أنا مش ممكن أقدر أعيش فى الجوده . شوفلك حل يافواز . أنا عاوزه أستقر . ش معقول كل يوم فى مكان . وكل يوم بهدله . | <b>هدايات :</b>  |
| إنتى مش ناقصك حاجة ياهدايات .                                                                                  | <b>فواز :</b>    |

**هدايات:** أنا ناقصنى الاستقرار والأمان . أنا كنت فى دار بوى  
أفضل من إهنة . كنت مرتاحة . ومستقرة . لو كنت عاوز  
أجيبلك الولد / يبقى لازم أستقر .

**فواز:** أنتي بتقولى أيه يا هدايات ؟  
**هدايات:** بقولك اللى حاسه به . الحقيقة اللى لازم تعرفها .  
أنت عاوز الخلفه . وأنى سألت وعرفت . الواحدة منا  
مش ممكن يجيلها حمل فى جو كله قلق وزعر ومطارده  
بالشكل ده .

**فواز:** هاعقد على واحدة تانية ونشوف صحة كلامك .  
**هدايات:** ( بشئ من السخرية ) مش ممكن تعمل إكده . أنا  
عارفك . أنت مش ممكن تأمن على روحك مع أى  
واحدة / أنا بقيت فهماك زين يافواز .

**فواز:** إنتى بتهددينى يا هدايات ؟  
**هدايات:** أنا عاوزاك تفكر فى مَخْرَجْ للى أنت فيه . واللى إحنا  
عاشين معاك فيه / كل يوم بتورط نفسك . وحققد  
الناس لك بيزيد . أنت لزمًا تفكر يافواز . إحنا مش  
ممكن نعيش فى الوضع ده / مش ممكن نستمر إكده .  
فكر . فكر زين يافواز . حتى ولو اضطريت انك تسلم  
نفسك للشرطة ( تدخل هند ) .

**هند:** لع . لع يافواز . ماتسمعلهاش . أيه اللى يتقوليه ده  
يأبت انتى . انتى كان وشك شؤم علينا يوم مادخلتى  
الدار / من يومها وكل المصائب بترف علينا . أوعاك  
تسمع لها يافواز . لوسلمت نفسك للشرطة مش

هتريحمك . أقل شئ أشغال شاقة مؤبدة . وأنا مش  
عاوزه أخسرك بقيت عمري .

**هــدایات:** أنا اتكلمت وقلت رأيي . ولك تاخذ بالرأى الزين .

**هــ : وإنّتى إيش تكونى لاجل مايكون لك رأى**

**ہدایات:**    انتی واخده بالك منی لیه / وأنا کان بینی و بینک شیء /

أنتى اللى دخلتيني الدار بخطرڪ . مش بخطرى .  
يبقى ليه كل ما اتكلم تدخلى اكده .

**ہند :** ( فی ندم ) غلطۃ . غلطۃ . وبادفع تمنہا .

**فـواز:** «مقاطعاً» (مستعملاً للكرباج) كفاية . كفاية . أنا

ماعدت عارف أفكر . ماعدت عارف أنا . انتو كان  
لزمًا تكونوا .

**هنا:** أنا خائفة عليك يافواز . خائفة عليك ( مهدئه

له ) ماتتكلمش كتير دلوقيت . أدخل ربح جوه  
شوية . يمكن تنام .

**فـواز:** اَنام . اَنام ازای . دانا فی نومی باکون صاحی . مفتوح

عینى . براقب اللی جای واللی رایح واللی داخل واللی  
خارج واللی طالع واللی نازل .

**هــ** ادخل نام يافواز . اطمئن . أنا هاسهر أحرصك .

**فواز:** هتنامی / أنا عارف أنك هتنامی وأنتی واقفه /

غضب عنك .

**همنده :** خلاص نتفق یافواز . نعملها وردیات . کل واحد منا

ينام في ميعاد محدد . إحنا أربعة نقسم الوقت بينا .  
أدخل نام يافواز واحنا هانتفق ( يخرج فواز ) .



|         |                                                                                                                                                                           |
|---------|---------------------------------------------------------------------------------------------------------------------------------------------------------------------------|
| هدايات: | اسمعينى ياهند . أحنا نتكلم مع بعض بصراحة .                                                                                                                                |
| هند:    | أنا مالى كلام معاك يابت انتى .                                                                                                                                            |
| هدايات: | أنا باعتبرك فى مقام والدتى / عشان إكده ماباخذ على خاطرى من كلامك .                                                                                                        |
| هند:    | قطع لسانك . أنا باتحملك عشان فواز وعشان والدك .                                                                                                                           |
| هدايات: | طب ليه مانتفاهمش أو نتفق عشان نرتاح ونريح فواز .                                                                                                                          |
| هند:    | بتخافى عليه إياك .                                                                                                                                                        |
| هدايات: | جوزى وولد عمتى .                                                                                                                                                          |
| هند:    | عشان إكده كتى عاوزاه يسلم نفسه للشرطة !                                                                                                                                   |
| هدايات: | أنا عاوزاه يرتاح من الزعر اللى جواه والخوف اللى حواليه .                                                                                                                  |
|         | ( يدخل محجوب وفى يده الطبنجة ) .                                                                                                                                          |
| هند:    | كت فىن يامحجوب ؟                                                                                                                                                          |
| محجوب:  | كت براقب الطريق من بعيد .                                                                                                                                                 |
|         | ( نسمع فواز يصرخ مفزوعا . يدخل ) .                                                                                                                                        |
| فواز:   | رصاص . رصاص . ضرب نار فى كل مكان وفى كل وقت . حتى فى الحلم .                                                                                                              |
| هند:    | خير يافواز . خبر أيه .                                                                                                                                                    |
| فواز:   | رصاص . رصاص . طلقات الرصاص حواليا فى كل مكان . كل البنادق مرفوعة على . كل طلقة باسمعها بتدخل صدرى / فى الحلم شايف نفسى مرمى على الأرض الرصاص بيمر من فوقى وكل ما أقف يدخل |

صدرى وأموت وأترمى فى الأرض . وكل ما أقف  
 الرصاص يدخل صدرى / أنا ماعدت قادر / حتى فى .  
 النوم / النوم ! / ياناس أنا ماعدت بقدر أنام . لكن لع .  
 أنا هاعرف أتغلب عليهم / هاتى السلاح ياهدايات .  
 أنا من هنا ورايح ماهنام غير والسلاح فى يدى .  
 ويبقى يجينى حد فى الحلم / وانتوا كل واحدة منكم  
 يكون سلاحها فى يدها . تسلم يامحجوب / عاوزك  
 ماتمشى إلا وطبنجتك فى يدك دائما .  
 ( يدخل مرسى مسرعا ) .

**مرسى :** فواز . فواز . لم خلجاتك وسيب المكان ده بسرعة  
 ( يلاحظ توتره ) .

**فواز :** أنت عرفت مكانى ده أزاى يامرسى ! ؟

**مرسى :** مش مهم دلوقيت . المهم أنك لزماً تسبب المكان ده حالا .

**هنده :** خير يامرسى . خبر إيه ؟

**فواز :** أنا .. أنا .. ( مرتبكا ) .

**مرسى :** أنت أيه . أتكلم يامرسى ... ؟

**فواز :** أنا غلطت فى حقك ياريس . غلطت فى حقك .  
 اقتلنى .

**مرسى :** طخنى بالطبنجة دى ( يعطيه طبنجة فى يده ) إقتلنى

بها دى الطبنجة اللى كنت كَلَّتْها عليك . أنا باعترف  
 بغلطتى . أنا بَلَّغْتُ عنك ياريس . الشيطان وزنى أبلغ  
 الشرطة عن مكانك . قالى إنى لو اتخلصت منك  
 هاخذ مكانك وأبقى ريس الجبل .. أنا .. أنا ..

**نواز:** ( مکذباً نفسه ) أنت يامرسی . أنت اللى تعمل إکده .  
ادخلی لم الخلدجات یاهند . ادخلی معاها یاهدایات .  
بسرعة ( تخرجان ) .

**محبوب :** أنت يا مرسى . تعمل إكده فى الرئيس اللي رفض  
يغدر بك .

**مـرسـی :** مش وقت الكلام يا محبوب . أنا عرفت غلطتى .  
عرفت ان الرئيس رفض ياخذ تار البرادعة منى وعرفت  
قد ايه معزتي عنده .

**فـواز:** فعلا يامحجوب . مش وقته الكلام . كلامك صُح  
يامرسى . مش وقته الكلام . وعشان الكلام سكت .  
يبقى لزما السلاح هو اللى يتكلم / بُصلى يامرسى .  
بُصلى عشان أنا ما بضرب حداً غير فى وشه ( يمسك  
الطنجة ويطلق النار على مرسى ) .

الراوي : مرسی دا کان یاماکان . نقول علیه بای بای . یاسادة  
یاکرام اللى غدر خد جزاءه . وفواز کان قالها کلمه .  
قال أنا ماغدرش بواحد کنا مملحين مع بعض . یعنى  
کَلّ معاه عیش وملح . لكن الغدر جه منه . عشان  
إکده فواز حاکمه . حکم ونفذ حکمه ( یدخل ضابط  
ومعه شاویش يتحرك بين الأفراد الموجودين بالمسرح بما  
فيهم الراوى والمستمعين ) .

**الضابط:** أنا مش عارف الحكاية إيه بالضبط . كل ما نسأل واحد من الناس عن فواز يسيبنا ويجري . زى ماتكون قرصته حية .

- الشاويش:** ياسعادة البيه الناس هنا بتخاف لو اتكلمت ينتقم منهم . ده مابيرحمش .
- الضابط:** يعنى ايه ياشاويش .
- الشاويش:** يعنى ياسعادة البيه . فواز لو عايش بينهم مش ممكن يوزوا عليه . ده كمان ممكن يخبوه فى بيوتهم .
- الضابط:** للدرجة دى رغم كرههم له .
- الشاويش:** الخوف اللى جواهم يعمل أكثر من إكده . ياسعادة البيه مفيش واحد فى البلد مايعرفش مكان فواز . ( يتحرك رجل أو ينزل من المستوى الذى عليه إلى المستوى الذى يقف عليه الضابط والشاويش ) .
- الضابط:** لكن فواز لازم هيقع فى أيدينا . سواء كان بمساعدتهم أو من غير مساعدتهم . هات الراجل اللى ماشى هناك ده ( يشير على رجل ١ ) .
- الشاويش:** انت ياراجل . تعالى هنا كلم سعادة البيه .
- رجل ١:** مين أنا !
- الشاويش:** أيوه أنت تعالى هنا . تعرف أيه عن فواز . أو عن مكانه ؟
- رجل ١:** فواز . ياخبر أسود . إلحقنا يا حاج راوى . إلحقنى . والنبي شدى خرجنى من الحكاية .
- الراوى:** لا ياسعادة البيه . سيبه ده تبعنا . دا واحد م السميعة اللى بيسمعوا القصة . مش من أفراد الحكاية .
- الضابط:** أنا مش عارف الأمور اللى هنا غريبة قوى .. الواحد مش لاقى حد يتكلم معاه . كل الناس اختفت ( يخرج الضابط والشاويش )

- رجل ١ :** الله يكرمك يا حاج راوى . أنت انقذتنى منه .
- الراوى :** أنت اندمجت قوى فى الحدوته ولا أيه . أيه يا بنى  
اللى دخلك الحكاية . خليك قاعد الناحية دى . بعيد  
عن حدود الحكاية بتاعتنا .
- ( يدخل فواز والمحجوب وتتحركان على مستوى  
السمعية والراوى فيدب الفرع بين الموجودين من  
الناس . بما فيهم المستمعين للراوى ) .
- أصوات** متداخلة من المستمعين : فواز . الرئيس فواز . إدارى  
يادانت وهو - يانهار مش فايت دا فواز ، ايه اللى  
جابه هنا - نهار ! قول ياليلة طين ...
- محجوب :** ياريس اهدا . أنت بقالك ٣ ليالى بتلف وما غمضت  
عينك لحظة .
- فـواز :** اسمع يا محجوب . إياك تخاف . أو يُخش الخوف جواك .
- الـراوى :** الناس همه اللى خافين .
- وده نتاج الخوف ياسامعين . خوف من الخوف / يولد خوف .
- فـواز :** لأنهم جُبنا . خوفهم هو اللى قوانى .
- الـراوى :** ماتحاولش تقول أنك مش خايف .
- فـواز :** الخوف جوايه . لكن عمره ماخرج من جوايا . عمرى ما  
خليت الناس تشوفه على .
- الـراوى :** ياللى زرعت الخوف جوه القلب . هانت .
- زرعت الخوف جوه القلوب وظنيت ان الحقيقة هامت  
لكن النهاية قربت والنتيجة من بعيد أهى . بانت  
الخوف ظهر جواك .

لا عرفت تفرق ما بين المخلص من الناس .

ولا بين الناس اللي خانت .

الخونة أكثر من المخلصين .

**فـواز:**

**الـراوى:**

يمكن لكن . فيه أشياء تانية كثيرة جوانا لازم نعرفها .

هى اللي بتحكمنا ( تدخل هند وهدايات ) .

**فـواز:**

أسمعونى زين أنا دلوقت قدامى سكتين ما فيش

خيار بينهم . أنا حياتى بقت بالوضع اللي أنتوا

شايفينه ده . عشان إكده مافى قدامى غير أنى أكون

إكده / مطارِد وبتنقل من مكان لمكان . أو أنى أسلم

نفسى للشرطة .

**هـند:**

بتقول أيه يافواز ؟

**فـواز:**

أسمعينى أما أكمل كلامى . إنتى ياهدايات تاخدى

خلجاتك وتعاودى دار بوك إنتى كان عندك حق فى

كل اللي قولتیه / إنتى ما ذنبك شئ فى العيشة دى .

**هدايات:**

أنا قلتلك إكده عشان تبص لنفسك . لكن أنا مش

ممکن أسيبك واحدك فى الظروف دى يافواز حتى

لو طختنى بالنار .

**فـواز:**

إعقلى ياهدايات ، عاودى دار بوك .

**هدايات:**

ما تحاولش يافواز . أنا مَرتك . ومش ممكن أقع فى

العيبة وأطوعك فى طلبك ده .

**فـواز:**

إكده ياهدايات . وإنتى ياهند .

**هـند:**

أوعاك تقولها يافواز / أنا هافديك ومش ممكن

اتخلى عنك .

**فـوـاز:** إنتى كبرتى ياهند ومش حمل البهدلة . ماعدتى  
تتحملى المطاردة .

**هـنـد:** خبر أيه يافواز . قلتلك . أنا مش ممكن أتخلى عنك ،  
وبعدين هاعاود أروح فين !! . خوى على ما أنت  
عارف اللى حصله بعد مافكر يخونك .

**فـوـاز:** كان يستحق اللى حصل له . لأنه فكر يعمل شغل من  
ورايأ لصالحه . لكنه ماكان قد الناس . كان فاكر  
نفسه حوت .

**هـنـد:** أنا مش بتناقش معاك يافواز ولا بأحاول أبرأه . على  
خد جزاءه . لكن أنا بقول أنى ماعاد لى غيرك أنت  
ومحجوب .

**فـوـاز:** لكن ده مش ممكن . طب تقعدوا فى مكان وأنا اللى  
هابقى أشقر عليكم .  
( يسمع صوت طلق نارى من بعيد . يتركهم فواز  
ويخرج مسرعا ) .

**الـسـراوى:** فواز ياسادة طار . ماعاد بيفكر / طار .  
ولكن الشرطة كمينها كان له حصار .  
والناس قالولى بأن فواز عاش أكثر من عشر أيام  
ماداق طعم الزاد . كان أحيانا ياسادة لما الحصار  
بيضيق عليه كان بيدارى جوه فتحات المجارى .  
أو يقعد باليوم واللاتنين فوق شجرة من غير مايتحرك .  
فواز تعب . ماعاد قادر يواصل / زهق / فواز صرخ .  
رفع سلاحه وعلق عليه الراية البيضاء . قال :

**فـواز:**

أنا عاوز أعيش مش عاوز أموت . أنا نفسى أعيش  
من غير خوف . أنا خايف منكوا ياناس . خايف من  
كل شئ حواليا . انتوا اللي خدتوا منى الأمان قبل  
ما أخده منكم . انتوا السبب . انتوا اللي قتلتموا أعز  
الناس قبل ما افكر أقتل واحد منكم . قتلتموا خوى  
حسان وهو لسه عريس . انتوا اللي صنعتوا منى فواز  
الخطر . أنا ياناس بقولها . أنا عاوز أعيش . أعيش  
زيكوا ويبقى لى ولاد ( تدخل هدايات والمحجوب ) .  
ولاد . أخوات للمحجوب . نفسى فى أولاد ياهدات .  
عاوزك يامحجوب تحقق اللي ماحققتهوش / الحلم كان  
جوايا كبير وأنتوا الى قتلتموه ( فى توهه . للناس )  
أو اللي قتله واحد منكوا .

أنا اللي كان لى حقوق وضاعت بينكوا  
أنا انهزمت لما كنت منكوا .

**صوت الضابط:**

سلم نفسك يافواز وارمى سلاحك ( تدخل هند ) .  
لع يافواز . الشرطة مش هترحمك . ارجع عن السكة  
دى . الشرطة نار وهاتعملك بالنار . هاتيهن كرامتك .  
صدقنى يافواز الشرطة ماهترحمك . ومابتفرق بينك  
وبين اللي رفض يسلم نفسه .

**هند:**

**فـواز:**

ارجعى انتى ياهند . المحجوب محتاجك .  
فـواز . أنا هستناك . أنا جيتلك اللي أنت  
عاوزه . أنا حامل يافواز . لازم تعيش عشان الولد  
وعشانى .

**هدايات:**



**فـواز:** بتقولى أیه یا هدايات . انتى صادقہ فى كلامك ؟

**هدايات:** صادقہ يافواز .

**هند:** ماتسلمش نفسك يافواز .

**صوت الضابط:** سلم نفسك . هنضرب بالنار لوقاومت .

( يتحرك المحجوب ويطلق النار من طبنجته ناحية

صوت الضابط . ثم تتبعه هند وتطلق النار من سلاحها

الذى فى يدها . تصل رصاصة من الخارج يقع على

آثرها فواز أرضاً ويدخل بعدها الضابط . تصرخ

هدايات وترقى على فواز .. ) .

**هدايات:** قتلته ليه ؟ . دا كان رافع الراية البيضاء . كان بيسلم

نفسه . ليه ؟ . أوعاك تموت يافواز محتاجينك .

محتاجينك يافواز .

**فـواز:** هدايات . كان لازم تكون دى نهايتى . الولد لازم

يكون حاجة كبيرة . لازم تكون له هيبة بين الناس .

ولد فواز لازم يعيش رافع راسه والناس كلتها عمله

حساب .

**هند:** أنت مش هتموت يافواز . ماتتكلمش كتير . الشرطة .

ها تحبيلك الإسعاف .

**فـواز:** هند / أنا خلاص انتهيت . كنت قاسى عليك لكن

كنت بحبك أنا حببتك ياهند / مش أى حد فى الدنيا

غيرك / حافظى على المحجوب . ولدى هايكون أمانة

تحافظى عليها . المحجوب وولدى هيكونوا أخوات

ياهند . ولدى اللى كان نفسى أشوفه ( يموت ) .

**هند :**

( باكية ) فواز . فواز !!

( تحمل هند محجوب وتخفت الاضائة على المسرح إلى  
أن تصبح مسلطة عليها فقط وهى تحمل المحجوب ..  
ويصل إلينا صوت الراوى وكأنه يعلق على الصورة »  
« منشدًا » : ولكن ظروفنا وبعض العادات .

**صوت الراوى**

بتحكم مصيرنا وتعند ساعات .  
ويبقى الشريف فى النهاية خطر .  
وقصتنا كانت حكاية وعبر .  
وقصتنا كان بطلها خطر  
عرفنا حكايته ، أما كان فى الصغر .  
ومن شافه مرة لزمًا يقول ومن شاف طفولته لزمًا يقول  
وكل من عايشه لزمًا يقول . بأن بطلنا لزمًا يكون .  
يكون فى النهاية فخر الوطن .

ولكن ظروفنا وبعض العادات .  
بتحكم مصيرنا وتعند ساعات .  
تحول مسار الطريق الصحيح .  
ويبقى الشريف فى النهاية خطر

**\*\* ستار \*\***

# الفهرس

رقم الصفحة

|    |                    |
|----|--------------------|
| ١٣ | ..... الفصل الأول  |
| ٣٩ | ..... الفصل الثاني |
| ٧٥ | ..... الفصل الثالث |



## صدر من الكتاب الأول

- ١ - صحراء على حدة قصص عاطف سليمان
- ٢ - دراسة فى تعدى النص نقد وليد الخشاب
- ٣ - حدث سراً قصص أمينة زيدان
- ٤ - رسوم متحركة شعر صادق شرشر
- ٥ - ليس سواك ما شعر عبد الوهاب داود
- ٦ - احتمالات غموض الورد شعر طارق هاشم
- ٧ - تدريبات على الجملة الاعتراضية قصص مصطفى ذكرى
- ٨ - كلوديسوس مسرحية محمد السلامونى
- ٩ - مسرحيتان من زمن التشخيص مسرحية محسن مصيلحى
- ١٠ - ليكن شعر هدى حسين
- ١١ - أحلام الجنرال مسرحية محمد رزق
- ١٢ - حفة شعر أصفر قصص محمد حسان
- ١٣ - يستلقى على دفء الصدف شعر عطيه حسن
- ١٤ - النيل والمصريون دراسة حمدى أبو كيلة
- ١٥ - الأسماء لاتليق بالأماكن شعر عزمى عبد الوهاب



- ٣٣ - جـمـر الأـصـابـع      شـعر      أشـرف يـونس  
٣٤ - سـقـوط ثـمـره وحيـدة      قـصـص<sup>١</sup>      حـسن صـبـري  
٣٥ - أمـسـيات عـائـلية      شـعر      سـعيد أبـو طـالب  
٣٦ - مـلـامـح وأحـوال      نـقـد      نـاصـر عـراق  
٣٧ - كـتـابة الصـورة      نـقـد      مـحمـد مـختـار  
٣٨ - نـتـاج الخـوف      مـسـرحـية      نـاصـر العـزـي

### لجنة الكتاب الأول :

غير ملزمة بإعادة أصول الأعمال إلى أصحابها سواء نشرت أو لم تنشر .





طبع بالهيئة العامة لشئون المطابع الأميرية

---

رقم الإيداع ٩١٧٦ / ١٩٩٩





726  
3



0271544

